

Inatsisissatut siunnersuummut oqaaseqaatit

Oqaaseqaatit nalinginnaasut

1. Aallaqqaasiut

Kalaallit Nunaanni annaassiniarnissamut upalungaarsimanermut maleruagassanik nutaanik piffissamullu naleqquttunik peqalernissaa anguniarlugu siunnersuut saqqummiunneqarpoq. Ikuallattoornissamik pinaveersaartitsineq akiuiniarnerlu pillugit Inatsisartut peqqussutaat 1992-imeersoq maannamut atuuttuusimasoq siunissami annaassiniarnissamut upalungaarsimanermut atuutsinneqalersussatut kissaatigineqartumut maleruagassaqaartitsinngilaq. Taamaattumik ikuallattoornissamik pinaveersaartitsineq akiuiniarnerlu pillugit Inatsisartut peqqussutaat 1992-imeersoq naleqqukkunnaarsimavoq atorsinnaajunnaarsimallunilu.

Ikuallannaveersaartitsineq qatserinerlu pillugit Inatsisartut peqqussutaat 1992-imeersumi maanna atuuttumi ilaatigut kommunini qatserisartoqarfiit, kiisalu ikuallattoqarnerani qatserisartoqarfiit illersorsinnaasumik annaassiniarnissaannut qatserinissaannullu periarfissaat, ikuallattoqarnissaanullu ulorianartorsiortoqarnerani pinaveersaartitsinerlut iliuusissat maleruagassiorneqarput. Aalajangersakkat taakku piffissamut naleqqunnerusunngortillugit ingerlateqqinneqassapput.

Siunnersuuteqarnermi upalungaarsimanermut suliassaqaarfimmut maleruagassanik piffissamut naleqqunnerusunik aalajangersaanissap pisariaqartinneqarnerata naammassineqarnissaa pingaarnertut siunertarineqarpoq, inuiaqatigiit ineriartorneranni annaassiniarnissamut upalungaarsimasunut piumasaqaatit annertusiartuinnarmata, kiisalu suliassat annaassiniarnissamut upalungaarsimasut tigujuartuaarsimasaasa, aammalu inatsisini atuuttuni ersarissarneqarsimanngitsut ilanngunneqartussaammata. Tassani assersuutigalugu annaassiniarnermi suliassat eqqarsaatigineqarput, taakkununga biilit ajutoornerini inunnik kiggigussimasunik kaanngartitsiniartarnerit aammalu imaani qaqqamilu annaassiniartarnerit ilaallutik.

Siunnersuut malillugu qatserisartoqarfiit siunissami annaassiniarnissamut upalungaarsimasunut, kommunit pilersitassaannut ilaalersussaapput. Qatserisartoqarfiit pioreersut taamaalillutik annaassiniarnissamut upalungaarsimasunut ilanngunneqassapput.

Siunnersuummi ikuallannaveersaartitsinerup qatserinerullu annaassiniarnissamut upalungaarsimasut suliassaannut ilaanissaannut aalajangersakkat ingerlateqqinneqarput.

Siunnersuummi annaassiniarnissamut upalungaarsimasuni killissat suliassallu aalajangersarneqarput, kiisalu annaassiniarnissamut upalungaarsimasut pilersaarusiornissaat ilaatinneqarlutik.

Siunnersuuteqarnermi isumassarsiaq tunngaviusoq tassaavoq, sumiiffimmi annaassiniarnissamut upalungaarsimasunik, ajutoortoqarnerani ajunaarnersuaqarneranilu, imaluunniit tamatumunnga ulorianartorsiortoqarnerani inuit, pigisat avatangiisillu ajoquserneqarnissaannik pinaveersaartitsinermi, killilersuinermi ikiuunnermilu pilertortumik sulinasuarsinnaasunik pilersitsisoqarnissaa.

Kommunit ataasiakkaat isumalluutiminnik, ulluinnarni annaassiniarnissamut upalungaarsimanermut iluaqutaasumik salliutitsisarnertik annertunerusumik atussavaat.

Tassalu kommunit ataasiakkaat pisariaqartillugu ajutoornermut annikinnerusunut annertunerusunullu ikiuussinnaassapput. Ajutoornerni annertunerusuni ajunaarnersuaqarneranilu, isumalluutissanik amerlanerusunik aammalu kommunip suliassa qarfiinit annertunerusumik pisariaqartitsisoqassappat, kommunit allat annaassiniarnissamut upalungaarsimasuinut ikiortissarsiortoqarsinnaassaaq.

Kommunit ataasiakkaat maleruagassiornissamut siunnersuutit, Naalakkersuisunit aalajangersarneqarsimasut malillugit upalungaarsimanermut pilersaarusiussapput. Kommunini upalungaarsimanermut pilersaarutit kommunini ikuallattoornermut maleruagassanut maannamut atuussimasunut taartaassapput.

Tamatuma saniatigut siunnersuummi upalungaarsimanermi immikkoortortamut akisussaaffeqarnerup atuutsinneqalernissaa anguniarneqarpoq, tassanilu oqartussaasut ataasiakkaat tamarmik immikkut suliassa qarfimminut akisussaasuussapput.

Immikkoortortanut akisussaaffeqarnerup atuutilerneratigut, oqartussaasut ataasiakkaat upalungaarsimanermik pilersitsissapput, kiisalu suliassa qarfimmik iluani upalungaarsimanissamut pilersaarusiussallutik, tassalu tassanerpiaq ulluinnarni sulianik ingerlatitseqqinnissaaq pineqarpoq. Immikkoortortani akisussaaffeqarnerup pilersinneqarneratigut, suliassa qarfiit ataasiakkaat ulluinnarni akisussaaffii ajutoortoqarnerani ajunaarnersuaqarneranilu atuussinnaalersillugit tasinneqassapput. Tamatumunnga atatillugu immikkoortortani akisussaaffiit ajutoortoqarnerani ajunaarnersuaqarneranilu tamatigut inuiaqatigiinni suliat ingerlaqqissinnaanissaannut iluaqutaassapput.

Immikkoortorta qarfinni akisussaaffeqartitsineq sullissisut assigiinngitsut akornanni akisussaaffinnik agguaanermut tunngaviuvoq, aammalu Namminersorlutik Oqartussani oqartussaasut akisussaaffeqarfimmik iluanni upalungaarsimanermut pilersaarusiortarnerannut tunngavioreerluni. Immikkoortortani akisussaaffeqarnerup atuunneratigut oqartussaasoq, suliffeqarfik sullissivilluunniit, ulluinnarni suliassa qarfimmut ataatsimut akisussaasuusoq aamma annertunerusumik ajutoortoqartillugu ajunaarnersuaqartillugulu suliassa qarfimmut pineqartumut akisussaasuusassaaq. Immikkoortortami akisussaaffeqarneq aamma immikkut ittumik pisoqartillugu nammineq akisussaaffeqarfigisap iluani suliassat qanoq iliorluni ingerlatiinnarneqasanserut ingerlateqqinneqassanersullu pilersaarusiornissamut akisussaaffeqarnermut tunngasuvoq.

Tassalu Naalakkersuisoqarfiit tamarmik immikkut ulluinnarni suliat tunngavigalugit upalungaarsimanermut pilersaarusiussapput, taakkunanilu immikkoortortamut akisussaaffeqarneq atuutsiinnarneqartassaaq. Pilersaarusiornermut akisussaaffeqarneq tassunga assingusoq kommunini oqartussaasunut isumagineqartussaavoq.

Taamaattumik oqartussaasut namminneerlutik suliassa qarfimmik iluanni upalungaarsimanisamik eqqarsaateqarsimanissaat, aammalu akisussaaffiit pingaarnertit agguarneqarnerinik ilisimasaqarnissaat pingaaruteqarpoq.

Taamaalilluni upalungaarsimanermut pilersaarusiornermi oqartussaasup, ulluinnarni suliassanik isumaginnittuusup, aammattaaq ajutoortoqarnerani ajunaarnersuaqarneranilu ulluinnarni

isumalluutit naammatsinnagit aammattaaq suliassanik isumaginnittuusarnissaat tunngavigineqassaaq.

Tassalu ulluinnarni aqutsinermi upalungaarsimanermut pisariaqartinneqartut eqqarsaatigineqartassapput, taamaalilluni upalungaarsimanermi piareersakkat sapinngisamik amerlanerpaat inuiaqatigiit aningaasaqarneranut naleqquttumik ingerlanneqartarnissaat anguniarneqartassalluni.

Aammattaaq siunnersuutip kingunerisaanik upalungaarsimanermut ataatsimiititaliarsuaq pilugu inatsisitigut aalajangersaasoqassaaq.

Upalungaarsimanermut naalakkersuisoq pilersaarutiniq ataqatigiissaarisuusaaq, aammalu pilersaarusiassat oqartussaasunit allanit akisussaaffigineqanngitsut isumagissallugit, taakunungalu upalungaarsimanermut ataatsimiititaliap sulineranut naleqqiullugu ataqatigiissagassat pingaernerit ilaapput.

2. Inatsisissatut siunnersuummi immikkoortut pingaernerit
Inatsisissatut siunnersuummi immikkoortut pingaernerit ukuupput:

Annaassiniarnissamut upalungaarsimanermik aalajangersaanissaaq, taamaalilluni kommuni annaassiniarnissamut upalungaarsimasunik inuit, igisat avatangiisillu ajoqusernissaannik pinaveersaartitsisussanik, killilersuisussanik ikiuuttussanillu ineriartortitsissallutik.

Siunnersuutip atuunneratigut piffissami sorsuffiunngitsumi suliassat upalungaarsimanermut aallaaviussapput. Taamaalilluni ajornartoornernik, ajutoornernik ajunaarnersuarnilluunniit pisoqassappat, piffissami sorsuffiunngitsumi suliassat ingerlateqqinneqartassapput, ajornartoornermi, ajutoornermi ajunaarnersuaqarneranilu allannguutaasussanik ilaqartinneqarlutik.

Kommunalbestyrelsi annaassiniarnissamut upalungaarsimanermut akisussaasuusaaq. Annaassiniarnissamut upalungaarsimasussarpianik pilersitsinikkut suliassat amerlanerulissapput annertunerulissallutillu, annaassiniarnissamut upalungaarsimasussat ajornartoornermi, ajutoornermi ajunaarnersuaqarneranilu aggersarneqartartussaassagamik. Annaassiniarnissamut upalungaarsimasut suliassanik takkuttunik nalinginnaasunik, ullumikkut qatserisartunit isumagineqartareersunik isumagisaqarsinnaassapput.

Immikkoortumut akisussaaffimmik nutaamik atuutsitsisoqalissaaq. Immikkoortumut akisussaaffeqarnerup nassatarisaanik oqartussaasut ataasiakkaat ajutoortoqarnerani ajunaarnersuaqarneranilu isumagisassatik isumagisartussaassavaat. Immikkoortoq pineqartoq upalungaarsimanermut pilersaarusiornissamut, kiisalu suliassaqrifiup pineqartup iluani upalungaarsimanerup ingerlasinnaanissaanut akisussaasuusaaq. Tassani ilaatigut uuliamik ajornartoornermi avatangiisinut oqartussaasut attuumassuteqartut ajornartoornermik isumaginnittuussapput.

Upalungaarsimanermut ilaatillugu annertunerusumik ajutoortoqarnerani, ajunaarnersuaqarnermi ajornartoornermiluunniit pilersaarusiornikkut imaluunniit pisariaqartinneqartunik iliuseqarnikkut inuiaqatigiinni suliassat ingerlaqqinnissaat isumagineqartassaaq.

Tamatuma nassatarisaanik Naalakkersuisut sinnerlugit upalungaarsimanermut naalakkersuisup upalungaarsimanermi suliaasat, oqartussaasunit allanit isumagineqartussaangitsut isumagisartussaavai.

3. Pisortanut aningaasaqarnikkut allaffissornikkullu sunniutissat

3.1. Pisortanut aningaasaqarnikkut sunniutissat

Siunnersuut kommunit aningaasartuuteqarnerulerannik kinguneqartussatut naatsorsuutigineqarpoq, kommunit annaassiniarnissamut upalungaarsimasunik, qatserisartoqarfiit pioreersut suliaat sinnerlugit suliaqartussanik, aammalu ilaatigut ajutoortoqarnerani ajunaarnersuaqarneranilu isumaginnittussanik pilersitsisussaammata, taakkunungalu ikuallattoqarneranut upalungaarsimaneq ilaavoq. Siunnersuummut atatillugu annaassiniarnissamut upalungaarsimasut pisortaannik, piffissaq naallugu sulisartussamik atorfinitsitsisoqassappat, kommunerujussuarmi ataatsimi ukiumut aningaasartuutaanerusussat 200.000 koruunit missaanniissapput.

Taassuma saniatigut kommunit namminneerlutik aningaasaliissuteqarsimanngitsut pisiassanut assigiinngitsunut, ilaatigut kaanngartitsiniarnermut atortunut qaqqamilu annaassiniarnermut atortunut aningaasartuuteqartoqarnissaa naatsorsuutigineqarpoq. Aningaasat qasserpiaassanersut oqaatigiuminaappoq, aningaasalli katillugit 1.500.000 koruuninut missiliorneqarsinnaassapput.

Kiisalu annaassiniarnissamut upalungaarsimasuni sulisut ilinniartinneqarnissaannut, taamaalillutillu suliaaminik isumaginnissinnaalernissaannut aningaasanik illuartitsisoqartussaasaaq. Taamaattumik qatserisartoqarfiit atuuttut ilinniartitaanikkut piginnaasaannik annertusaanissaq, taamaalillutillu annaassiniarnissamut upalungaarsimanermi suliaasaminnik isumaginnissinnaatitsilernissaq pisariaqartussaavoq. Tamatuma peqatigisaanik kommunerujussuarni annaassiniarnissamut upalungaarsimasunut pisortat ikinnerpaamik sisamat ajornartoornermi sulisinnaanermut ilinniartinneqarnissaat pisariaqartussaavoq, kommunerujussuarni sisamaasuni pingaarnertut akisussaalertussaagamik. Tamatuma aningaasaqarnikkut sunniutissai qanoq annertutigissanersut maannarpiaq nalileruminaappoq.

Tamatuma peqatigisaanik upalungaarsimanermut ataatsimiititaliap ilaasortaasa ajornartoornermi sulisinnaanermut ilinniartinneqarnissaannut aningaasartuuteqarnissaaq, kiisalu upalungaarsimanermut ataatsimiititaliap sulineranut aningaasartuuteqarnissaaq naatsorsuutigineqartariaqarpoq. Upalungaarsimanermut ataatsimiititaliap sulineranut aningaasartuutissat Naalakkersuisunit matuneqarsinnaassapput.

3.2. Pisortanut allaffissornikkut sunniutissat

Pisortanut allaffissornikkut annertunerusumik sunniuteqartussatut naatsorsuutigineqanngilaq.

4. Inuussutissarsiornermut aningaasaqarnikkut allaffissornikkullu sunniutissat

Inuussutissarsiornermut aningaasaqarnikkut allaffissornikkullu sunniuteqartoqarnissaa naatsorsuutigineqanngilaq.

5. Avatangiisinut pinngortitamullu sunniutissat

Siunnersuut avatangiisinut pinngortitamullu sunniuteqartussatut naatsorsuutigineqanngilaq.

6. Innuttaasunut allaffissornikkut sunniutissat

Siunnersuut innuttaasunut allaffissornikkut artukkiisussatut naliliiffigineqanngilaq.

7. Pissutsit naalagaaffeqatigiinnermut namminersornermullu tunngasut
Siunnersuut naalagaaffeqatigiinnermut sunniuteqassanngilaq.

Siunnersuut namminersornerunerup annertunerulernissaanut iluaqutaasussatut isigineqarpoq.

8. Oqartussaasunut suleqatigiiffinnullu il.il. tusarniaaneq

Inatsisissatut siunnersuutip allaqqaarnera 2009-mi xx-imiit xx-imut ukununga tusarniaassutiginerpoq: KANUKOKA, Mittarfeqarfiit, Nukissiorfiit, Royal Arctic Line, Greenland Mining Service, Naalakkersuisut siulittaasuata Naalakkersuisoqarfia, Aningaasaqarnermut Nunanullu Avannarlernut Naalakkersuisoqarfik, Kultureqarnermut, Ilinniartitaanermit, Ilisimatusernermit Ilageeqarnermullu Naalakkersuisoqarfik, Inuussutissarsiornermit Aatsitassanullu Naalakkersuisoqarfik, Isumaginninnermit Naalakkersuisoqarfik, Peqqissutsimut Naalakkersuisoqarfik, Aalisarnermit, Piniarnermit Nunalerinermullu Naalakkersuisoqarfik, Nunap Iluani Pissutsinut, Pinngortitamut Avatangiisinullu Naalakkersuisoqarfik, Kalaallit Nunaanni Politimestereqarfik, Kalaallit Nunaanni Naalagaaffiup Ombudsmandia, Danmarkimi Upalungaarsimanermit Aqutsisoqarfik, Grønlands Kommando, Illersornissamut Ministeriaqarfik, Danmarkimi Avatangiisinut Ministeriaqarfik.

Tusarniaaneq makkuninnga tunngavissiivoq:

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

Imm. 1

Aalajangersakkami annaassiniarnermut upalungaarsimasunik, ajutoortoqarnerani ajunaarner-suaqarneranilu, imaluunniit tamatumunnga annertuumik ulorianartorsiortoqartillugu inuit, pigisat avatangiisillu ajoqusernissaannik pinaveersaartitsisussanik, killilersuisussanik ikiuut-tussanillu pilersitsinissamut ingerlatsinissamullu pisussaaffeqarneq pineqarpoq. Annaassiniar-nissamut upalungaarsimasut ineriartortinneqarnerisa kommuninit isumagineqaannarnissaa siunnerfigineqarpoq.

Aalajangersakkami suliassat ataatsimoortut, oqartussaasunit allanit, ulluinnarni ajutoortoqar-neranut ajunaarner-suaqarneranullu atatillugu suliniuteqarsinnaanermut akisussaasuusunit i-sumagineqartussat kalluarneqanngillat. Tassalu annaassiniarnissamut upalungaarsimasut as-sersuutigalugu avatangiisinut oqartussaasut upalungaarsimanerannut, mittarfiit upalungaarsi-manerannut aamma timmisartumik imaatigullu annaassiniarnermut attuumassuteqanngillat.

Oqaaseqaatini nalinginnaasuni oqaatigineqartutut ulluinnarni suliassat annaassiniarnissamut upalungaarsimasunit aallaavigineqartussaapput, taamaalillunilu ajutoortoqarnerani ajunaar-nersuaqarneranilu suliassat ulluinnarni suliassanik nalinginnaasunik ingerlatitseqqinnerussap-put, ajutoornermi ajunaarner-suaqarneranilu allannguutaasariaqartunik allannguuteqartinneqas-sallutik.

Imm. 2

Aalajangersakkami maannamut atuuttutut annaassiniarnissamut upalungaarsimasut agguarne-qarsinnaanerit, aammalu upalungarsimasunik arlalinnik immikkoortortaqsarsinnaanerit aala-jangersarneqarpoq.

2009-mi januaarimiit kommunit 18-iusimasut sisamanut kattunneqarput, taamaattumillu an-naassiniarnissamut upalungaarsimasut minnerpaamik sisamanik immikkoortortaqtartussaap-put. Kisiannili annaassiniarnissamut upalungaarsimasut sisamanit amerlanerusunngorlugit agguarneqarnissaat pissusissamisuginnassaaq, nunap ilusaa pissutaalluni tamanna pisaria-qarmat. Tassalu immikkoortut pingaarnert sisamaasut taakku, kommunit aggorneri malillugit pilersinneqartussat ataanni immikkoortortanik pilersitsinissaq tassani pineqarpoq.

Upalungaarsimasut tamarmik assigiimmik atortoqartinneqarnissaat sulisoqartinneqarnissaallu pisariaqassasoq ilimananngilaq. Tamannali immikkoortortamiit immikkoortortamut nalilerne-qartassaaq, aammalu upalungaarsimaffiusuni najugaqarfiit illullu tunngavigerpiarlugit nalilii-neq tunngavigineqartassalluni.

Kommunit 18-iniit kommuninut sisamanut kattunneqarnissaat sioqqullugu illoqarfinni tamani “qatserisartut motorilinnik atortullit” ikuallattunik qatseriartortarput, nunaqarfiillu nalingin-naasumik atortunik oqinnerusunik atortoqartarlutik. Tamatumunnga atatillugu immikkoortor-tat ataatsimoortunik illullit najukkami annaassiniarnissamut upalungaarsimasoqarnissaat pis-susissamisuuksaaq.

Tamatuma saniatigut immikkoortortanit annerusunit atortunik sulisunillu inniminniisinnaanis-saq eqqartorneqarsinnaavoq.

Imm. 3

Naalakkersuisut annaassiniarnissamut upalungaarsimasut annertussusissaannut maleruagassanik sukumiisunik aalajangersaassapput, taakkunungalukommunini ataasiakkaani qatserutitut ataasiakkaanut sulisullu amerlassusissaannut malitassat ilaassapput.

Taakku maannamut kaajallaasitami aalajangersarneqartarsimapput, kisiannili maanna nalunaarusiornikkut aalajangersarneqarsinnaalerlutik. Maannarpiaq atortut nalinginnaasut sulisullu amerlassusaat pillugu kaajallaasitaq nr. 1, 15. marts 1994-imeersoq atuuppoq, taannalu inatsit manna naapertorlugu taarserneqarnissami tungaanut atuutissalluni.

§ 2-mut

Aalajangersagaq aaqqissuussaanermigut allannguuteqartinneqarluni peqqussummi maanna atuuttumi § 11-p assingaa.

Imm. 1

Qatserisartoqarnermik nakkutilliineq siornatigut Grønlands Tekniske Organisation-imit, Nuna- Tek-imit isumagineqarsimavoq. Tamatuma kingorna Grønlands Byggevesen-imit, Københavnimi Brandsektionen-imit isumagineqalerpoq.

Grønlands Byggevesen aaqqissuuteqqinneqarmat, suliaasaqarfillu nunatsinnut nuunneqarmat nakkutilliineq Naalakkersuisunit isumagineqalerpoq, Peqqissutsimut Avatangiisinullu Pisor-taqarfimmi Avatangiisinut Pinngortitamullu Ingerlatsivimmit suliarineqarluni.

Tamatuma ingerlaannarnissaa siunnersuutigineqarpoq, nakkutilliinerli maanna upalungaarsimanermut naalakkersuisunit isumagineqarpoq. Upalungaarsimanermut Naalakkersuisoq tas-saavoq, upalungaarsimanermut suliaasaqarfimmi naalakkersuinikkut akisussaasoq.

Tassalu taassuma atuunneratigut kommunini tamani annaassiniarnissamut upalungaarsimasu-nut Naalakkersuisut aqutsinermi qullersaassapput.

Imm. 2

Naalakkersuisut annaassiniarnissamut upalungaarsimasunut nakkutilliisussaapput, tassalu kommunit ajutoornernut ajunaarnersuarnullu atatillugu suliaasaalersussanik isumaginissin-naasunik annaassiniarnissamut upalungaarsimasoqarnissaat Naalakkersuisunit qulakkeerne-qassaaq.

Kiisalu Naalakkersuisut kommunini annaassiniarnissamut upalungaarsimasut nakkutigineqar-nissaannut tunngasunik tamanik sukumiinerusunik maleruagassiorsinnaassapput, taakkunun-galu assersuutigalugu annaassiniarnissamut upalungaarsimasunik misiliilluni kalerrisaarisar-nerit ilaapput.

§ 3-mut

Aalajangersagaq nutaajuvoq, tassanilu ilaatigut upalungaarsimanermut ataatsimiititaliamik pilersitsisoqarnissaa aalajangersarneqarpoq.

Imm. 1

Naalakkersuisut annaassiniarnissamut upalungaarsimasunut aqutsinermi oqartussaasuni qul-lersaammata, Naalakkersuisut upalungaarsimanermut ataatsimiititaliamik pilersitsisussaanagerat

aalajangersakkami aalajangersarneqarpoq. Upalungaarsimanermut ataatsimiititaliap Naalakkersuisunut tunngatillugu suliniutit malinnaaffigissavai, pisariaqarneranilu suliniutinik ataqtigiissaarisassalluni.

Tamatuma nassatarisaanik upalungaarsimanermut ataatsimiititaliap Naalakkersuisut immikkut siunnerfigalugit politikikkut suliassaqarfimmi suliassaqarfittut pingaarnertut atuutissaaq. Taamaattumik upalungaarsimanermut ataatsimiititaliap Naalakkersuisunut toqqaannartumik attaveqassaaq, aammalu pissutsit pillugit paasissutissat politikikkut suliassaqarfimmut ingerlateqqittassallugit.

Upalungaarsimanermut ataatsimiititaliap sulinerminut atatillugu ajutoortoqarnerani ajunaarnersuaqarneranilu inuiaqatigiit sapinngisamik pitsaanerpaamik ingerlasinnaanissaat suleqataaffigissavaa. Kiisalu upalungaarsimanermut ataatsimiititaliap nunami ajutoortoqarneranut ajunaarnersuaqarneranullu atatillugu pisariaqartinneqarpat inuit eqqortut upalungaarsimanermut ataatsimiititaliamut aggersarneqarnissaat isumagissallugu pisussaavoq.

Imm. 2

Upalungaarsimanermut ataatsimiititaliap nunap iluani upalungaarsimanermut pilersaarummik, Kalaallit Nunaannut atuuttussamik, kiisalu nunami ajutoortoqarneranut ajunaarnersuaqarneranullu atatillugu pilersaarutip atuuffissaanut atuutilersussamik suliaqassaaq. Nunap iluani upalungaarsimanermut pilersaarut Naalakkersuisunut akuerisassanngorlugu nassiunneqannginnermini, upalungaarsimanermut ataatsimiititaliap ataatsimiinnerini aalajangiiffigineqaaqtassaaq.

Nunap iluani upalungaarsimanermut pilersaarut atuutissaguni, Naalakkersuisunit akuerineqarnissaa pisariaqarpoq.

Tunngaviusumik upalungaarsimanermut naalakkersuisoqarfik naalakkersuisoqarfittut akisussaasuusooq nunap iluani upalungaarsimanissamut pilersaarusiortussaavoq, taannalu upalungaarsimanermut ataatsimiititaliamit aalajangiiffigineqartussaavoq Naalakkersuisunillu akuerineqartussaalluni. Tunngaviusumik upalungaarsimanermut naalakkersuisup allaffeqarfia upalungaarsimanermut pilersaarummik suliaqartussaavoq.

Imm. 3

Upalungaarsimanermut ataatsimiititaliami ilaasortat annertunerusunik ajutoortoqartillugu ajunaarnersuaqartillugulu, imaluunniit pisariaqartillugu ataatsimiigiaqquneqartassapput. Upalungaarsimanermut ataatsimiititaliap siulittaasuata, immaqqa upalungaarsimanermut ataatsimiititaliami ilaasortat allat isumasioqatigereerlugit naliliinera tunngavigalugu ataatsimiigiaqqusi-soqartassaaq.

Ajutoornerni annerusunik ajunaarnersuaqarneranilu, imaluunniit pisariaqartinneqartillugu upalungaarsimanermut ataatsimiititaliami ilaasortat aggersarneqarnissaannut siulittaasup naliliinera tunngavigineqartussaammat, pisut ilaanni upalungaarsimanermut ataatsimiititaliami ilaasortat kattunnissaat pisariaqartartussaannngilaq. Assersuutigalugu pisut ingasanngikkaangata, upalungaarsimanermut ataatsimiititaliami ilaasortat katersuuttariaqartassanngillat.

Siulittaasooq inissisimanini tunngavigalugu aammalu pisoq pineqartoq apeqqutaatillugu, pisup upalungaarsimanermut ataatsimiititaliami ilaasortanut ilisimatitsissutigineqarnissaa kisimi pisariaqartinneqarnerisooq naliliisassaaq.

Upalungaarsimanermut ataatsimiititaliap annertunerusumik ajutoornerni ajunaarnersuaqarneranilu suliniuteqarnissaq politiit suleqatigalugit ataqatigiissaassavaa.

Imm. 4

Upalungaarsimanermut ataatsimiititaliap Naalakkersuisunut Naalagaaffimmilu oqartussaasunut paasissutissat tamakkiisut saqqummiutissavai, taamaalilluni Naalakkersuisut Naalagaaffimmilu oqartussaasut upalungaarsimanermi pissutsinik ilisimatinneqartassallutik, taakkunungalu ajutoornerit ajunaarnersuillu tamatuminnga pisariaqartitsiviusut ilaapput.

Siulittaasup upalungaarsimanermut ataatsimiititaliami ilaasortaq peqatigalugu ajutoornerit ajunaarnersuillu pillugit qaqugukkut Naalakkersuisut Naalagaaffimmilu oqartussaasut ilisimatinneqartassanersut naliliiffigisassavaa.

Kiisalu upalungaarsimanermut ataatsimiititaliap allattoqarfia upalungaarsimanermut pilersaarutit assigiinngitsut ataatsimut aqqissuunneqarnerinut, aammalu Kalaallit Nunaanni nunap iluani upalungaarsimanermut pilersaarutip pingaarnerup suliarineqarneranut atatillugu suleqataasassaaq.

Kalaallit Nunaanni nunap iluani upalungaarsimanermut pilersaarut pingaarneq, ajutoornernut ajunaarnersuarnullu atatillugu atorneqarsinnaasoq pisariaqartinneqartussaavoq. Upalungaarsimanermut pilersaarummi pingaarnermi pilersaarutit pisariaqartinneqartut attuumassuteqartullu, ajutoortoqarnerani ajunaarnersuaqarneranilu annaassiniarnissamut upalungaarsimasunit pitsaasumik atorneqarsinnaasut eqikkarneqassapput.

Upalungaarsimanermut naalakkersuisup allaffeqarfiata upalungaarsimanermut ataatsimiititaliap allattoqarfiani suliaasat isumagissavai, taamaattumillu naalakkersuisoqarfik pineqartoq upalungaarsimanermut suliaasaqarfik pillugu ilisimatinneqartassaaq paasissutissanillu nutartevigineqartassalluni.

Imm. 5

Upalungaarsimanermut pilersaarutit upalungaarsimanermullu ataatsimiititaliap misilerarniarlugit, upalungaarsimanermut ataatsimiititaliap akuttoqatigiinnik sungiusartitsisarnissaa siunnersuutigineqarpoq. Taakkunungalu aamma upalungaarsimanermut pilersaarutit aqqittariaqartut paasineqassappat aqqiisarnissaq ilaavoq. Tamanna ilaatigut akuttoqatigiinnik sungiusartitsisarnikkut aammalu upalungaarsimanermut pilersaarutit misilerartarnerisigut paasineqarsinnaasassaaq.

Tamatuma saniatigut upalungaarsimanermut ataatsimiititaliap pikkorissartitsinernik attuumassuteqartunik aqqissuussisassaaq peqataatitaqartassallunilu. Taamaalilluni upalungaarsimanermut ataatsimiititaliap upalungaarsimanerup iluani paasissutissanik nutaanik pissarsisarnaanissaa ilinniagaqarsimanissaalu isumagineqarsinnaavoq, tamannalu tunngavigalugu suliasaminik isumaginninnissamut naleqquttunik tunuliaqutaqarsinnaalerluni pisariaqarfiisigut qisuariarsinnaalissalluni.

Upalungaarsimanermut ataatsimiititaliap suliasaminik naammaginartumik isumaginnissinaanissaa anguniarlugu, upalungaarsimanerup iluani paasissutissanik nutaanik pissarsisarnissaa ineriartornermullu malinnaasinnaanissaa pingaaruteqarpoq.

§ 4-mut

Aalajangersagaq nutaajuvoq, aammalu upalungaarsimanermut ataatsimiititaliap katitigaaneranut tunngasuulluni.

Imm. 1

Upalungaarsimanermut ataatsimiititaliaq aalajangersimasunik qulingiluanik ilaasorta qarpoq, taakkulu oqartussaasunit ukunangga ilaasorta atitaapput:

Naalackersuisut, KANUKOKA, Peqqinnissakkut Nakkutilliisoqarfik, Kalaallit Nunaanni Politimestereqarfik, Grønlands Kommando aamma Kalaallit Nunaanni Naalagaaffiup Ombudsmandia.

Oqartussaasunit ataasiakkaanit ilaasortassamik ataatsimik toqqaasoqartassaaq, kisiannili Naalackersuisuniit ilaasortassanik ikinnerpaamik marlunnik toqqaasoqartassalluni. Upalungaarsimanermut naalackersuisoqarfiup ilaasortassat Naalackersuisut sinnerlugit toqqaartassavai.

Ilaasortat aalajangersimasut katitigaaneranni, oqartussaasuni pineqartuni suliassa qarfigisap iluani ilisimasat annertuut misilittakkanillu tunngaveqartut, aammalu upalungaarsimanermut ataatsimiititaliap sulineranut tapersiisinnaaneq suleqataasinnaanerlu tunngavigalugit toqqaasoqartassaaq.

Upalungaarsimanermut naalackersuisoqarfimmit ilaasortassanik amerlanerusunik toqqaanisamat, upalungaarsimanermut naalackersuisup upalungaarsimanermut aammalu upalungaarsimanermut ataatsimiititaliamut taassumalu sulineranut pingaarnertut akisussaasuunera tunngavigineqarpoq. Taamaattumik upalungaarsimanermut naalackersuisoqarfiup upalungaarsimanermut ataatsimiititaliami ataaseq sinnerlugu ilaasorta atitaqarnissaa, upalungaarsimanermut ataatsimiititaliap sulineranut pingaaruteqarpoq.

Naalagaaffimmi oqartussaasut upalungaarsimanermut ataatsimiititaliamut ilaasorta atitaqarnissaannut, naalagaaffimmi oqartussaasut pineqartut tamanna pillugu isumaqatigiissute qarfigineqareersimanissaat piumasaqaatigineqarpoq.

Upalungaarsimanermut naalackersuisup ilaasortassanik marlunnik toqqaanerata saniatigut, avatangiisinut peqqissutsimullu naalackersuisoqarfiit tamarmik immikkut ilaasortassamik peqataatitassaminnik ataatsimik toqqaassapput.

Imm. 2

Upalungaarsimanermut naalackersuisoq siulittaasoqarfimmi ilaasortassanik toqqaassaaq, upalungaarsimanermut naalackersuinermi akisussaasutut inissisimasuugami. Upalungaarsimanermut ataatsimiititaliami siulittaasoqarfik upalungaarsimanermut naalackersuisup siulittaasussatut toqqagaanit, kiisalu upalungaarsimanermut ataatsimiititaliap allattoqarfianit isumagineqassaaq. Assersuutigalugu ajornartoortoqarnerani upalungaarsimanermut ataatsimiititaliap sulilersineqarnissaanut inuup ataasiinnaanngitsup attaveqarfigineqarsinnaanissaa tamatumunga tunngavigineqarpoq.

Siulittaasumut tullersorteqarneq KANUKOKA-mi ilaasorta atitamit, upalungaarsimanermut naalackersuisumit toqqarneqarsimasumit isumagineqassaaq. KANUKOKA siulittaasumut tullersorteqartitsissaaq, KANUKOKA kommunit, taamaalillunilu kommunini annaassiniarnisamat upalungaarsimasut sinnerlugit ilaasorta atitaqartussaammat.

Imm. 3

Upalungaarsimanermut ataatsimiititaliaq suliassa qarfinni attuumassuteqartuni ilaasortaatanik pisariaqartitsisoqarneratigut aggersaasinnaavoq.

Tassalu immikkut ittumik suliaqartoqartillugu ajornartoornermi pisariaqartitsisoqarpat, imaluunniit immikkut ittumik tamanna pisariaqartinneqarpat, ilaasortamik aggersaasoqarsinnaavoq.

Imm. 4

Upalungaarsimanermut ataatsimiititaliap sulinerani aningaasartuutit tamarmik Naalakkersuisunit akilerneqartartussaasut imm. 4-mi aalajangersarneqarpoq.

§ 5-imut

Aalajangersagaq aaqqissuussaannermigut allannguuteqartinneqarluni peqqussummi maanna atuuttumi § 2-p assingaa.

Imm. 1

Imm. 1 malillugu kommunalbestyrelsi annaassiniarnissamut upalungaarsimasunut akisussasuuvoq.

Najukkami annaassiniarnissamut upalungaarsimasut annaassiniarnissamut upalungaarsimnerminni suliassanik suliaqarsinnaanngorlugit, illersorneqarsinnaasumik ineriartortinneqarnissaannik qulakkeerinissaq nakkutilliinissarlu kommunalbestyrelsip akisussaaffigaa.

Imm. 2

Kommunalbestyrelsip annaassiniarnissamut upalungaarsimasut ingerlanneqarnerannik qulakkeerinissap kommunalbestyrelsip pisussaaffigaa aalajangersakkami pineqarpoq. Kommunalbestyrelsi annaassiniarnissamut upalungaarsimasunut qullertut aqutsisuuvoq, aammalu annaassiniarnissamut upalungaarsimasut nammineerluni aaqqissuunnissaannut inatsisitigut tunngavissaqarluni, tassungalumaleruagassat pingaarnerit Naalakkersuisunit aalajangersarneqarsimasut tunngavigalugit katiterisinnaaneq ilaavoq, tak. § 1, imm. 3.

Kisiannili kommunalbestyrelsi pisussaavoq, annaassiniarnissamut upalungaarsimaneq pillugu apeqqutini tamani annaassiniarnissamut upalungaarsimanermut pisortaq aamma Kalaallit Nunaanni Politimestereqarfimmi inuk toqqarneqarsimasoq suliassanik, inatsimmut matumunnga attuumassuteqartunik allaffissornikkut suliaqarnermik isumaginnitsissallugit. Taamaattumik inuit pineqartut annaassiniarnissamut upalungaarsimanermi apeqqutini attuumassuteqartuni suleqataasussaapput allatulluunniit ikiuuttussaallutik. Upalungaarsimanermut pisortap politiilu ajutoornerni ajunaarnersuaqarneranilu suliniuteqarnermut atatillugu pisariaqartunik piginnaatitaanerit tamatumunnga pissutaavoq.

§ 6-imut

Aalajangersagaq aaqqissuussaannermigut allannguuteqartinneqarluni peqqussummi maanna atuuttumi § 4, imm. 1-ip assingaa.

Imm. 1

Imm. 1 kommunalbestyrelsip upalungaarsimanermut pisortassamik, siunissami piffissaq tamakkerlugu atorfeqartussamik, aammalu kommunimi upalungaarsimanerup ulluinnarni aqun-

neqarnerani ilinniartitaanikkut suliassanik isumaginninnissamut piginnaaneqartumik atorfinitsitsisarnissaanut maleruagassanik imaqarpoq.

Ilinniartitaanikkut piginnaaneqarfigilersimasassat pisariaqartinneqartut minnerpaamik tassaasapput:

- Tunngaviusumik ilinniartitaaneq I aamma II
- Ikiueqqaarnermut pikkorissarneq
- Ikuallattoqarnerani sulinissamut ilinniartitaaneq
- Ilitsersuisumut ikiorti/inersimasunik perorsaanikkut tunngaviusumik pikkorissartitsineq
- Ikuallattoornermi holdlederi
- Illoqarfinni suliniuteqarnermut pisortaq
- Timmisartuni suliniuteqarnermut pisortaq

Upalungaarsimanermit pisortap kommunimi annaassiniarnissamut upalungaarsimasut akissusaaffigissavai, aammalu sulinerminut atatillugu suliniuteqarnermut pisortatut qullersaasutut isigineqassalluni.

Pisariaqartinneqarpat ilinniartitsisoqassaaq, taamaalillunilu upalungaarsimanermit pisortaq aalajangersimasumik atorfinitsinneqartoq suliarnik isumaginninnaanissamut piginnaaneqarfinnik pisariaqartinneqartunik angusaqarsinnaassalluni.

Imm. 2

Kommunimi annaassiniarnissamut upalungaarsimanermit upalungaarsimasunut pisortap piffissaq tamakkerlugu atorfeqartinneqartussaana imm. 2-mi aalajangersarneqarpoq.

Upalungaarsimanermit pisortap piffissaq tamakkerlugu atorfeqartinneqarnissaanut aalajangersakkami inuiaqatigiinni ineriartorneq ingerlasoq, annaassiniarnissamut upalungaarsimasunut, minnerunngitsumik assersuutigalugu ikuallattoorsinnaanermik misissuisarnikkut ikualtasaaliuinermit atatillugu piunasaqaatinik annertusiartortitsiviusoq pissutaasutut isigineqassaaq.

Kiisalu upalungaarsimanermit pisortamik piffissaq tamakkerlugu atorfissaqartitsinissaaq piunasaqaatigineqarpoq, upalungaarsimanermit pisortatut suliassat annertuutut isigineqarmata, taamaattumillu upalungaarsimanermit pisortanik atorfinitsitsiortornissaaq pisariaqartinneqarluni. Tamatumani aamma annaassiniarnissamut upalungaarsimanerup suliassani qaffatsinneqarnissaanut, upalungaarsimanermullu pisortat tamatumani pingaarutilittut inissisimanissaanut atasutut eqqarsaatigineqassaaq.

Kommunit arlallit nammineerlutik qatserisartunut pisortanik piffissaq tamakkerlugu atorfeqartinneqartunik, upalungaarsimanermit pisortatut atorfinissinnaasunik atorfinitsitsisareersimammata oqaatigineqassaaq. Tamatumunngali atatillugu ilinniartitaanerit qaffassarneqarnissaanut aningaasanik illuartitsinissaaq pisariaqartussaavoq.

Imm. 3

Imm. 3-p atuunneratigut kommunalbestyrelsi suliniuteqarnermit pisortanik minnerpaamik marlunnik atorfinitsitsisussaavoq. Suliniuteqarnermit pisortat annaassiniarnissamut upalungaarsimanermit pisortaq taarsersinnaassavaat, taamaattumillu annaassiniarnissamut upalungaarsimanermit pisortap ilinniartitaanikkut piginnaasaasa assinginik piginnaasaqartussaallu-

tik. Taamaalilluni ilinniaqqinnissamut aammalu ilinniakkamik qaffassaanissamut periarfissii-soqassaaq.

Suliniuteqarnermut pisortanik atorfinitsitsinissaaq naapertuutissaaq, taakku upalungaarsimaner-mut pisortap suliaaminik isumaginninnissamut periarfissaqannginnerani taartaasartus-saammata, imaluunniit pisut ima annertutigippata, allaat upalungaarsimaner-mut pisortaq su-liassamut ikiorneqartariaqarpat ikiuuttussaallutik.

Suliniuteqarnermut pisortanik atorfinitsitsinermi inuk akisussaasoq ilinniagaqarsimasorlu, kommunimi annaassiniarnissamut upalungaarsimanermik ataqatigiissaariner-mik isumaginnit-tussaaq tamatigut pigineqartussaavoq.

Imm. 4

Kommunini (kommunerujussuarni sisamaasuni) suliniuteqarnermut pisortamik ataatsimik, sanaartukkani ikuallattoornissamut teknikkimut tunngasunik suliaqarnissamut ilinniarsima-sumik soraarummeersimasumillu peqarnissaa aalajangersakkami oqaatigineqarpoq, taamaalil-luni suliaasat ikuallattoornissamut teknikkimut tunngasut inummit ilinniarsimasumit isumagi-neqarsinnaassammata. Inuk ikuallattoornissamut teknikkimut tunngasunik suliaqarnissamut soraarummeersimasooq upalungaarsimaner-mut pisortaaqanngilaq.

Tamatuma peqatigisaanik kommunini timmisartunut suluusalinnut mittarfilinni, minnerpaa-mik timmisartuni suliniuteqarner-mut pisortatut ilinniarsimasumik peqarnissaa aalajanger-sakkami aalajangersarneqarpoq. Annaassiniarnissamut upalungaarsimasut mittarfinni pissut-sinik ilisimasaqarnissaat, kiisalu mittarfinni upalungaarsimanermi ikiuuttarnissaat tamatu-munnga tunngaviuvoq.

Imm. 5

Illoqarfiup pingaernerup avataani upalungaarsimasuni tamani suliniuteqarner-mut pisortamik ataatsimik amerlarusunilluunniit atorfeqartitsisoqarnissaa imm. 5-imi aalajangersarneqarpoq. Suliniuteqarner-mut pisortap nammineerluni upalungaarsimaffigisamini annaassiniarnissamut upalungaarsimasut, taakkulu ajutoortoqartillugu ajunaarnersuaqartillugulu pitsaanerpaamik illersorsinnaasumillu ingerlasinnaanissaa akisussaaffigissavai. Suliniuteqarner-mut pisortaq tassaasariaqarpoq upalungaarsimanermik ilisimasalik, suliniuteqarner-mut pisortaq suliaas-aqarfiup iluani misilittagaqartussaammat, kiisalu qanitami avatangiisinik pissutsinullu upalu-ngaarsimaffimmi pineqartumi atuuttunik ilisimasaqartussaalluni.

Kommunimi immikkoortortaq pingaarneq illoqarfimmi inuttunerpaasumi imaluunniit illoqar-fimmi kommunip immikkoortortaqarfittut pingaarnertut atuuttussatut aalajangersimasaani inissisimassaaq. Assersuutitut Qaasuitsup Kommuniani Ilulissat aamma Kommuneqarfik Ser-mersuumi Nuuk eqqaaneqarsinnaapput.

Kommunini upalungaarsimaner-mut immikkoortortat tunngaviusumik illoqarfimmi allani taak-kulu nunaqarfiini pissutsit assilillugit ineriartortinneqarsinnaapput agguarneqarsinnaallutillu.

Imm. 6

Kommunalbestyrelsip annaassiniarnissamut upalungaarsimasuni sulisunik allanik atorfinitsit-sisartussaanaera imm. 6-imi taaneqarpoq. Inuttat atorfissaqartinneqartut qanoq ittuussanersut qanorlu amerlatigissanersut kommunalbestyrelsip nammineerluni nalilersuiffigissavaa.

Kommunalbestyrelsi annaassiniarnissamut upalungaarsimasunut taakkulu katitigaanerinit akisussaasuvoq, taamaattumillu annaassiniarnissamut upalungaarsimasut qanoq ilusilerneqassanersut kommunalbestyrelsip naliliiffigisussaavaa aalajangertussaallugulu. Taamaattumik kommunalbestyrelsip sulisussat katitigaaneq kissaatigineqartoq tunngavigalugu atorfinitsittasavai.

§ 7-imut

Aalajangersagaq aaqqissuussaaneermigut allannguuteqartinneqarluni peqqussummi maanna atuuttumi § 4, imm. 3-p assingaa, tassanilu annaassiniarnissamut upalungaarsimasuni sulisut maleruagassat, Namminersorlutik Oqartussat aamma KANUKOKA-p akornanni isumaqatiginninniartoqareerneratigut aalajangersarneqarsimasut malillugit akissarsiaqartinneqarnerat akissaasersorneqarnerallu pineqarpoq.

Akissarsiaqartitsinermut akissaasersuinernullu maleruagassat Kalaallit Nunaanni qatserisartunut ilaasortanut, siunissami annaassiniarnissamut upalungaarsimasuni sulilersussanut akissarsiaqartitsineq akissaasersuinerlu pillugit maleruagassat sukkulluunniit atuuttut naaportorlugit aalajangersarneqartassapput.

§ 8-mut

Aalajangersagaq aaqqissuussaaneermigut allannguuteqartinneqarluni peqqussummi maanna atuuttumi § 7-ip assingaa, tassanilu aamma maanna annaassiniartarnerit aalajangersakkamut ilaatinneqarput. Aalajangersagaq annaassiniarnissamut upalungaarsimasut maleruagassat Naalakkersuisunit aalajangersarneqarsimasut malillugit ilinniartitaasarnissaannut tunngasuvoq.

Aalajangersagaq malillugu annaassiniarnissamut upalungaarsimasuni sulisut ilinniartitaanerannut maleruagassat Naalakkersuisunit aalajangersarneqartassapput. Annaassiniarnissamut upalungaarsimasut immikkut ittumik ilinniartitaasarnissaat piunasaqaataassaaq. Assersuutigalugu annaassiniarnissamut upalungaarsimasut immikkut ilinniartitaanerannut tunngatillugu qaqqani annaassiniarnerit, aammalu ilinniartitaanerit attuumassutillit allat, annaassiniarnissamut upalungaarsimasunut pitsannguisussat taaneqarsinnaapput.

Ilinniartitaanerit Kalaallit Nunaanni Qatserisartut Ilinniarfianni, Kalaallit Nunaanni ilinniartit naleqqussinnaasut allat, soorlu Aarhus-imi qatserinermik ilinniartit, suleqatigalugit ingerlanneqartassapput. Maannarpiaq Kalaallit Nunaanni tunngaviumik ilinniartitaanerit I aamma II, aammalu ikiueqqaarnermut pikkorissartitsinerit ingerlanneqarput.

Tamatuma saniatigut ilinniartitaanerit allat, soorlu ikuallattoqarnerani sulinissamut ilinniartitaanerit – qatserineq holdlederillu – siunissami qanittumi Kalaallit Nunaannut ingerlanneqarnissaat eqqarsaatigineqarpoq, Taamatuttaaq “putsumut isertartunut ilitersuisutut” aamma “containerinik kukutsisartunut ilitersuisuunertut” ilinniartitaanerit ingerlanneqarnissaat eqqarsaatigineqarput, taakkuli suli naammassineqanngillat.

Qatserisartuni sulisut ilinniartitaanerannut maleruagassanik maannarpiaq qatserisartoqarfinni sulisut ilinniartitaanerit pillugu nalunaarusiami nr. 33-mi, 6. september 2001-imeersumi peqarpoq. Nalunaarutip inatsit manna naaportorlugi annaassiniarnissamut upalungaarsimasuni sulisut ilinniartitaanerit pillugu maleruagassanit nutaanit taarserneqarnissami tungaanut atuunnissaa naatsorsuutigineqarpoq.

§ 9-mut

Aalajangersagaq nutaajuvoq.

Imm. 1

Ikuallattoqartillugu aamma inunnik, pigisanik avatangiisinillu ajoqusertoqartillugu annaassiniarnissamut upalungaarsimasut aggersarneqarsinnaanissaat imm. 1-imi aalajangersarneqarpoq. Tassani ilaatigut assersuutigalugu ikuallattoornerit qaartoornermilu ajutoornerit, nakkaattoornerit, timmisartut nunami ajutoorneri umiarsuillu talittarfimmiitillutik ajutoorneri, kiisalu nunami akuutissanik ulorianartunik aniasoorfiusinnaasunik ajutoornerit, ajutoornerusinnaasullu allat, aammalu ajunaarnersuit pineqarput. Aalajangersakkami ilaasussat tamarmik taaneqanngillat. Annaassiniarnissamut upalungaarsimasut kommunip killeqarfiisa iluanni suliaassanik isumaginnittuussapput, tassanilu kommunit aggornerisa malinneqarnissaat pineqarpoq.

Nutaatut annaassiniarnissamut upalungaarsimasut qimarnussanik navialisunillu allanik ti-gooqqaanermi, inissiigallarnermi isumassuinnermilu inunnik isumaginninnermut oqartussaasunut ikiuuttussaapput. Ajutoornerit ajunaarnersuillu kingunerisassaasa pakkersimaarneqarnissaat siunertarineqarpoq. Tamanna ilaatigut ikiuisarfimmik taasap, qimarnussanik navialisunillu allanik tapertaasussap ikiuuttussallu pilersinneqarneratigut pisinnaassaaq.

Qimarnussanik navialisunillu allanik isumaginnittarneq kommunip upalungaarsimanermit pilersaarutissaani suliareqqissaarneqassaaq, taamaattumillu kommunit upalungaarsimanermit pilersaarutaannut ilaatinneqartariaqarluni.

Imm. 2

Imm. 1-imi ilaatinneqanngitsoq imm. 2-mi pineqarpoq. Annaassiniarnissamut upalungaarsimasut akisussaaffinut naleqqiullugu SAR-imi (Search- and Rescue) suliaassat aamma peqqinnissaqarfiup annaassiniarnermi suliaassai kommunip killeqarfiisa iluanni annaassiniarnissamut upalungaarsimasut suliaasaannut ilaatinneqanngillat. SAR-ip Naalagaaffimmit isumagineqartussaanera tamatumunnga tunngavigineqarpoq, taannalu ilaatigut imaani ujaasisarnerit annaassiniartarnerillu pillugit nunat tamat akornanni isumaqatigiisummi, 27. april 1979-imeersumi (IMO) aamma SOLAS-imut isumaqatigiisummi (Convention on Safety of Lives at Sea) 1974-imeersumi, ilaatigullu International the Convention on International Civil Aviation-imut (ICAO). 7. december 1944-meersumut Standards and Recommended Practices Search and Rescue, Annex 12-imi aalajangersaaffigineqarpoq, tak. ilanngussaq 1-imi tamanna pillugu allaaserisat sukumiisut.

SAR-imik suliaassat aamma peqqinnissaqarfiup annaassiniarnermi suliaassaasa killingi peqqinnissaqarfiup politiillu akornanni isumaqatigiisummi, 29. marts 2006-imeersumi nassuiarneqarput.

Politiit ujaasinerannut atatillugu inummik ajoqusersimasumik napparsimalersimasumilluunniit nassaartoqarpat, politiit pisussaapput pineqartoq ukioq kaajallallugu najugaqarfiusumut sumiiffimmulluunniit tassunga assingusumut, isumaqatigiisummi matuma siuliani nassuiarneqartumut ingerlatissallugu. Politiilli taamatut angallassinissamut pisussaaffiat atuutissappat, assartuinerup ajoqusersimasumut aammalu politiini sulisunut isumannaatsumik illersorsinnaasumillu ingerlanneqarsinnaanissaa piumasarineqarpoq.

Taamatut assartuinissaq assartuut atorineqartoq atorlugu isumannaatsumik illersorsinnaasumil-
lu ingerlanneqarsinnaanngitsoq politiini sulisunit ikiuuttunit naliliiffigineqarpat, Kalaallit Nu-
naanni peqqinnissaqarfik pisussaavoq assartuut naleqquttoq atorlugu napparsimasumik, pisu-
mi pineqartumi politiit ujaasinerannut inuup nassaarineqarneranut atatillugu sumiiffianik ili-
simaneqartumik aallissalluni.

Kiisalu peqqinnissaqarfiup aamma politiit akornanni isumaqatigiissut 29. marts 2006-
imeersoq aamma inatsimmut ilanngussaq 1 innersuussutigineqarput.

Imm. 3

Ajutoornerup ajunaarnersuaqarnerullu pineqartup annertussusia pissutigalugu pisariaqartinne-
qarpat, annaassiniarnissamat upalungaarsimasut kommunimi allami annaassiniarnissamat
upalungaarsimasunut, Statens Luftfartsvæsen-imu (RCC) Grønlands Kommando-mut politi-
nullu ikiuunnissamat pisussaaffeqarnerat imm. 3-mi pineqarpoq.

Ajutoornerup ajunaarnersuulluunniit annertussusia pissutigalugu ikioqqulluni qinnuteqarto-
qarpat pisussaaffeqarnek atuutilissaaq. Tassani ajutoorneq ajunaarnersuarluunniit ilaatigut ima
annertussuseqarsinnaavoq, allaat kommuni, RCC, MRCC politiilluunniit suliassanik naam-
massinninniarlutik kommunimi annaassiniarnissamat upalungaarsimasunit ikiorserneqarnis-
samik pisariaqartitsilersimallutik, imaluunniit ajornartoornermi pineqartumi allamiit ikiorser-
neqarnissamik pisariaqartitsilersimallutik.

Pisariaqartitsineq assersuutigalugu suliassaqarfimmi immikkut ittumi pisumik pineqartumik
naammassisaqarnissamat kommunip piginnaaneqarfigineruppagu pisinnaavoq. Taamatullu
aamma atortunik pissarsiniarnissaq tassani pineqarsinnaavoq.

Imm. 4

Suliassat annaassiniarnissamat upalungaarsimasunit sularineqartussat pillugit maleruagassat
sukumiiisut Naalakkersuisunit aalajangersarneqassapput. Taakkununga ikuallattoqarneranut
aamma inunnik, pigisanik avatangiisinillu ajoqusertoqarneranut atatillugu annaassiniarnissa-
mut upalungaarsimasut suliniuteqarsinnaanissaat ilaassaaq.

§ 10-mut

Aalajangersagaq naapertorlugu kommunalbestyrelsi kommunip annaassiniarnissamat upalu-
ngaarsimasuini suliassat isumagineqarnerini ikiorneqarnissaq pillugu peqatigiiffinnut, aaqqis-
suussinernut namminersortunullu isumaqatigiissuteqarsinnaavoq.

Isumaqatigiissusiornissaq kommunalbestyrelsip akisussaaffigaa. Tamatumanili suliassat aaq-
qinneqarasuartussat tamarmik annaassiniarnissamat upalungaarsimasunit isumagineqarnissaat
piumasaqaataavoq, taakku suliassaqarfimmut akisussaasuummata immikkullu ilisimasaqar-
tuullutik.

Aalajangersagaq malillugu isumaqatigiissutit nalinginnaasumik kommunimi annaassiniarnis-
samat upalungaarsimasut iluanni suliassanut ataasiakkaanut tunngasuusarput, assersuutigalu-
gu nammineq piumassutsiminnut ikiuukkusuttunik pissarsiornermut imaluunniit paasititsi-
niaanermut tunngasuullutik.

Kangerlussuarmi Narsarsuarmilu qatserisartut mittarfiit illuutaannut tunngatillugu suliassat
mittarfinni upalungaarsimasunit sularineqartarput. Pissutsit taakku maleruagassanit isumaqa-
tigiissutinilluunniit allanit taarserneqarnissamik tungaanut atuutissapput.

§ 11-mut

Aalajangersagaq peqqussummi maanna atuuttumi § 9-p assingaa.

Aalajangersakkami ilaatigut sumiiffinni erngup aqqutaanit toqqaannartumik imermik pissarsi-soqarsinnaatinnagu pissusiviusut eqqarsaatigineqarput.

Imm. 1

Pisortat imermik pilersuineranni sapinngisamik qatserinissamut imermik naammattumik pilersuisoqarnissaa, taamaalillunilu imermik maqitsiviit pisariaqartinneqartut ikkussuunneqarnissaat, imaluunniit imermik pilersuivinnik, soorlu biilnik seqqitsaatinik imaluunniit imertaatinik naammattunik peqarnissaa eqqarsaatigineqassaaq. Imermik pilersuivimmik naammattumik peqarnissap qulakkeerneqarnissaa erngup aqqutaanik inissiinikkut annertusititsinikkullu, taamaalillunilu pitsaanerpaamik atuisoqarsinnaalerneratigut pisinnaavoq.

Imermik pilersuivik aserfallatsaaliusisussaaitavoq, aammalu imermik pilersuinerup pisariaqartinneqartup ingerlatinnissaa isumagisussaallugu. Pisortat imermik pilersuiviisa taamaalillutik taakkununnga aningaasartuutissat nammattussaavaat.

Pisortat imermik pilersuiviisa pilersuisussaaitaanerat, taamaalillutillu upalungaarsimanermi annaassiniarnissamut upalungaarsimasut qatserinerminnut assigisaannullu imermik atuisussaaitillugit pilersuisussaaitaanerminnik naammassinnittussaananerat tamatumunnga pissutaavoq.

Imm. 2

Naalackersuisut imermik maqitsiviit inissiffissaat, ilusiligaanerat, imermik pilersuineq, taasunga sullissineq naqitsinermillu pissarsisinnaaneq ilanngullugit, maleruagassat sukumiisut nalunaarutikkut aalajangersassavaat. Taamatullu Naalackersuisut aqqusinernut taakkulu aputaajarneqartarnerinut, kiisalu qerisoornikkut, aportinnikkut allanilluunniit pisoqarnerani ajoquserneqarnissamut qularnaarinissamut piunasaqaatit pillugit maleruagassiussapput.

Imm. 3

Namminersortut imermik pilersuiviisa pisortanit nakkutigineqarsinnaanerat kommunalbestyrelsimit aalajangerneqarsinnaasoq aalajangersakkami aalajangersarneqarpoq. Namminersortut imermik pilersuiviisa aserfallatsaalineqarnerat ingerlanneqarnerallu kommunimit isumagineqassaaq.

Namminersortut imermik pilersuiviisa pisortanit nakkutigineqarnissaat taamaallaat atuutissaaq, tamanna qatserinermi aammalu annaassiniarnissamut upalungaarsimasut sulineranni pitsaasumik imermik pilersorneqarnissaaq pisariaqartinneqarpat.

Imm. 4

Kommunalbestyrelsip tasilianik ataavartussanik, tasernik, kuunnik imaluunniit sumiiffinni isortat imaluunniit namminersortut ukioq kaajallallugu erngup aqquaatigut pilersuiviumngit-suni immami milluaavissanik ammatinneqarlutik piareersimasunik akuersisinnaanera imm. 4-mi aalajangersarneqarpoq. Taakkuli piffissami qerinarfiusumi illersorneqarsinnaasumik qatserinissamut atugassatut ammatinneqassapput.

Qatserinissamut ammatitsinermi ilaatigut ikuallattoornermi imermik pilersuinermi atugassatut siku putuneqarsimasinnaavoq.

Imm. 5

Kommunalbestyrelsip imertaatit pisariaqartinneqartunik amerlassusillit biilinuq oqquisitsisarfinnut kiassakkanut inissisimasut pigineqarnerisigut imermik pilersuivinnik angallattakkanik pilersitsinikkut, imermik pilersuivinnik aalajangersimasunik peqarnissamut piumasaqaat atorunnaarsissinnaagaa imm. 5-imi aalajangersarneqarpoq.

Taamaattumik imermik pilersuivinnik aalajangersimasunik peqartoqartinnagu, assersuutigalugu imertaatinik biilinuq oqquisitsisarfinni kiassakkanik piareersimasuutitaqarnikkut ikuallattoornermi imermik pilersuivinnik angallattakkanik atuinnissaq ajornartinneqanngilaq.

Imm. 6

Kommunip imm. 4 aamma 5 naapertorlugit ikuallattoornermi imermik pilersuivinnik aalajangersimasunik angallattakkanilluunniit atuutsitsinermut aningaasartuutit akilersinnaagai imm. 6-imi oqaatigineqarpoq.

Imm. 7

Imermik maqitsiviit imermillu pilersuviit minnerpaamik ukiumut marloriarlutik misissorneqartartussaasut, kiisalu pisariaqartitsinikkut pisinnaasaat misilinneqartartussaasut imm. 7-imi aalajangersarneqarpoq. Imermik maqitsiviit imermillu pilersuviit siunertamut pitsaanerpaamik atorneqarsinnaanissaat pisinnaanissaallu tamatumani tunuliaqutarineqarpoq. Taamatuttaaq pisinnaasaasa misilinneqartarnissaat pisariaqarsinnaavoq.

§ 12-imut

Aalajangersagaq nutaanik ilassuteqartinneqarluni peqqussummi maanna atuuttumi § 15-p assingaa.

Aalajangersagaq qatserinermi annaassiniarnermilu naalakkersuisoqarnermut tunngasuuvuq.

Upalungaarsimanermut pisortaq taartiluunniit, assersuutigalugu suliniuteqarnermut pisortaq pigaartuusooq, ilinniartitaanikkut pisariaqartinneqartunik piginnaaneqartoq taassuma toqqagaa aqutsisutut akisussaasuuvuq. Taassuma atuunneratigut upalungaarsimanermut pisortaq pigaartuusariaqanngilaq, suliniuteqarnermilu aqutsisuusariaqarani.

Imm. 2

Naalakkersuisut suliniuteqarnermi teknikkikkut aqutsisoqartarneq pillugu nalunaarusiami sukumiinerusumik maleruagassiorsinnaasut imm. 2-mi aalajangersarneqarpoq.

Kalaallit Nunaanni qatserisartunut pisortanut ilitsersuut, 31. januar 1980-imeersoq, inatsit manna naapertorlugi maleruagassiarineqartunik taarserneqarnissami tungaanut atuutissaq.

§ 13-imut

Aalajangersagaq peqqussummi maanna atuuttumi § 16-ip assingaa, aammalu annaassiniarnissamut upalungaarsimasut aggersarneqarnerinut atatillugu politiit ataqatigiissaarinissaannut tunngasuulluni.

Annaassiniarnissamut upalungaarsimasut aggersarneqarnerini politiit pisariaqartitsineq malillugu kalerrisaarinissaq, assiaqusersuinissaq qimarnussinissarlu isumagissavaat.

Suliassat politiit politiit oqartussaasutut sulinerannut tapiliussaapput, politiit ilaatigut assiaqusersuinissamut piginnaatitaammata. Tamatuma illersorsinnaasumik aammalu politiinut malittarisassat malillugit pinissaa politiit akisussaaffigaat.

Politiit inatsisinik atortitsisuugamik, annaassiniarnissamut upalungaarsimasut aggersarneqasimatillugit kalerrisaarinissamik, assiaqusersuinissamik, qimarnussinissamik assigisaanillu iliuuseqarnissamik isumaginninnissaat suliaannut nangissutaaginnarpoq.

§ 14-imut

Aalajangersagaq aaqqissuussaannermigut allannguuteqartinneqarluni peqqussummi maanna atuuttumi § 13, imm. 4-p assingaa.

Imm. 1

Annaassiniarnissamut upalungaarsimasut sulinerminnut atatillugu sakkunik assartuutinillu nammineq pigisanik atugassinneqarnissaq piumasarisinnaavaat. Kiisalu annaassiniarnissamut upalungaarsimasut sullissisussanik pisariaqartinneqartunik atugassinneqarnissatik piumasarisinnaavaat.

Innuttaasut namminersortullu allat annaassiniarnerni ikiuunnissamut pisussaataapput. Tassungattaq innuttaasut namminersortullu allat sakkui assartuutaallu ilaapput. Annaassiniarnissamut upalungaarsimasut assersuutigalugu assartuut pineqartoq annaassiniarnermut atatillugu atorneqarsinnaasoq naliliippata, assartuutip annaassiniarnissamut upalungaarsimasunut atugassiissutigineqarnissaa pisussaaffiuvoq. Tamannattaq inunnut ikiuuttussanut atuuppoq.

Imm. 2

Sakkunik assartuutinillu atugassiisoq atortunik atuinngitsoornermut sakkullu atorneqarnerini ajoqusernerusinnaasunut kommunimit taarsiiffigineqarsinnaatitaasoq, imm. 2-mi aalajangersarneqarpoq.

Innuttaasut namminersortullu namminneerlutik sakkumik assartuutimilluunniit annaassiniarnissamut upalungaarsimasunit atorneqarnerinut, imaluunniit atorneqarnerminni ajoquserneqarnerinut akiliisarnissaat siunertarineqanngilaq.

Taamaattumik kommunip annaassiniarnissamut upalungaarsimasui atortunik allanit, taakkunungalu namminersortut sakuunik suliniuteqarnermut atatillugu ajoquserneqarsimasinnaasunik atuisimatillugit kommuni taarsiisussaataasassaaq,

§ 15-imut

Aalajangersagaq aaqqissuussaannermigut allannguuteqartinneqarluni peqqussummi maanna atuuttumi § 14-ip assingaa, tassanilu annaassiniarnissamut upalungaarsimasut suliniuteqarnerminni qanorluunniit ittuni illunik putusillutik isaterillutilluunniit sumiiffinnut nammineq pigisanut isersinnaatitaanerit pineqarpoq.

Imm. 1

Annaassiniarnissamut upalungaarsimasut qanorluunniit suliniuteqarnerminnut atatillugu eqqartuussivimmit aalajangiinertaqanngitsumik sumiiffinnut nammineq pigisanut isernissamut pisinnaatitaasut imm. 1-imi allassimavoq. Taassuma atuunneratigut pisariaqartillugu annaassiniarnissamut upalungaarsimasut suliniuteqarnerminnut atatillugu akornutinik isaterinissamut piaanissamullu pisinnaatitaapput.

Imm. 1-imi annaassiniarnissamut upalungaarsimasut annertuumik pisinnaatitaaffilerneqarmata, erseqqissassallugu pingaaruteqarpoq, eqqartuussivimmit aalajangiinertaqanngitsumik sumiiffinnut nammineq pigisanut isersinnaatitaaneq aatsaat annaassiniarnissamut upalungaarsimasut suliniuteqarneranut atatillugu pisariaqartinneqarpat atorneqassammat.

Taamaattumik suliassamik naammassinninniarluni sumiiffinnut nammineq pigineqarsimasinnaasunut isernissaq pisariaqartinneqarneraq, kiisalu illunik putoorinissaq isaterinissarlunniit pisariaqartinneqarneraq naliliiffigineqassaaq. Periarfissamik aseruiffiunnginnerusumik allamik peqarpat, taanna atorneqassaaq.

Imm. 2

Imm. 2-mi annaassiniarnissamut upalungaarsimasut ajoqusernerup siaruarnissaa unitsinniarlugu illunik isaterinissamut akornutinillunniit piaanissamut piginnaatinneqarpat.

Ajoqusernut siaruariartornissaat unitsinneqarsinnaappat imaluunniit ajoqusernut annikillisinneqarsinnaappata annaassiniarnissamut upalungaarsimasut illunik isaterinissamut aamma akornutinik piaanissamut periarfissaqartinneqassappat. Pisut ilaanni assersuutigalugu illumik ikuallattoqartillugu, aammalu illumit ikuallattumit inneq illunut saniliiniittunut siaruarnissaa ulorianaateqarpat, ajoqusernerit annertussusaannik killiliiniarnermut atatillugu tamanna pissusissamisuuginnassaaq.

Upalungaarsimanermut pisortaq taassumaluunniit taartaa illunik isaterisoqassanersaq imaluunniit akornutinik piaasoqassanersaq aalajangissalluni piginnaatitaavoq. Upalungaarsimanermut pisortaq taassumaluunniit taartaa ajoquserfiusumi suliniuteqarnermut akisussaasuvoq, taamaattumillu annaassiniarnissamut upalungaarsimasut suliassatik suliariniassappatigit akornutinik isaterisoqassanersaq piaasoqassanersorlu nalilertussaallugu.

Akornutinik isaterinissaq piaanissarlunniit pisariaqassanersaq eqqarsaatigalugu naleqqersuilluni naliliisoqassaaq. Annaassiniarnissamut upalungaarsimasut suliassatik suliarisinnaappatigit, illunik isaterinissaq imaluunniit akornutinik piaanissaq pisariaqarpat taamatut pisoqassaaq. Kisiannili akornutinik isaterinissamut piaanissamullunniit naleqqiullugu aaqqiissutissanik allanik nassaartoqarsinnaappat, taakku atorneqassappat.

Imm. 3

Qatserinermi ajoqusiinerit ikuallattoornermi ajoqusikkatut isigineqartussaanagerat imm. 3-mi aalajangersarneqarpoq. Tassalu ajoqusiinerit annaassiniarnissamut upalungaarsimasut qatserinerannik pissuteqartut pillugit taarsiiffigineqarnissaq qinnuteqaatigineqarsinnaanngilaq.

Qatserinermut atatillugu ajoqusikkatut ikuallattoornermi ajoqusikkatut isigineqartussaammata, illumut ikuallattumut ikuallattoornissamut sillimmasiissuteqarfik ikuallattoornissamut sillimmasiissut aqutigalugu illunut isaterneqartunut taarsiisussaavoq. Illu ikuallattoq ikuallattoornissamut sillimmaserneqarsimannigippat, illumik piginnittoq ajoqusikkanut akiliisussaavoq, tassungalu illunik allanik isaterinissaq ilaavoq.

Imm. 4

Pinngortitami qatserinermi suliniuteqarnermut akiliutissat kommunimit pissusaaffigineqarnerat aalajangersakkami aalajangersarneqarpoq.

Taassuma atuunneratigut illoqarfiup nunaqarfiullu killeqarfiisa avataanni ikuallattumik qatserisoqassappat qatserisoqarpallu kommuni akiliinissamut pisussaavoq. Taanna ikuallannaveersaartitsineq qatserinerlu pillugit Inatsisartut peqqussutaannut siornatigut atuuttumut naleqqiullugu erseqqissaaneruvoq.

2000-imiit 2005-imut pingortitami 50-it missaannik qatserisoqarsimavoq. Taamaattumik ukiumut pingortitami qatserinermut 300.000 koruunit missaannik immikkoortitsisoqartarnissaa siunnersuutigineqarpoq, soorunami annertussuserisinnaasaat oqaatigineqarsinnaasussaangimmat.

§ 16-imut

Aalajangersagaq aaqqissuussaannermigut allannguuteqartinneqarluni peqqussummi maanna atuuttumi § 4-p assingaa.

Annaassiniarnissamut upalungaarsimasut suliniuteqarnerminnut atatillugu imiisivinnik, erngup aqquataanik imermillu pilersuivinnik allanik namminerisamik pigineqartunik atuisinnaatitaapput.

Tamannali taamaallaat annaassiniarnissamut upalungaarsimasut allatut imermik pissarsisinnaatinnagit pisariaqartitsisoqartillugu atuutissaaq.

§ 17-imut

Aalajangersagaq maanna peqqussummi § 17-imut naleqqiulluni allannguuteqanngilaq, aammalu annaassiniarnissamut upalungaarsimasut upalungaarsimanermi suliniuteqarnermut atatillugu pasinartunik paasisaqartoqartillugu politiinut nalunaarnissamut pisussaaffeqarnerannut tunngasuuluni.

Aalajangersagaq naapertorlugu ajutoornermut suna pissutaasimasinnaanersoq annaassiniarnissamut upalungaarsimasut eqqumaffigissavaat, aammalu paasisaqartoqarnerani uppersaatissanillu nassaartoqarnerani misissuinissaq tunngavissaqartillugu, misissuinerup ingerlaqqinnissaa siunertarlugu politiinut ingerlatitseqqissallutik.

Kiisalu annaassiniarnissamut upalungaarsimasut annaassiniarnermik suliniuteqarnermut atatillugu pasinartunik paasisaqarunik, erngerlutik politiit ilisimatissavaat. Nalunaaruteqarneq erngerluni pissaaq, taamaaliornikkut uppersaatissat pilertornerpaamik qulakkeerneqassammata.

§ 18-imut

Aalajangersagaq nutaajuvoq.

Imm. 1

Ikuallattoornermut kalerrisaarutit nammineq aallartartut inatsisitigut pisussaaffiusut tunngavissaqanngitsumik kalerrisaarinerini annaassiniarnissamut upalungaarsimasut ornigunnerinut akitsuummik kommunalbestyrelsip akiliisitsisinaanera aalajangersakkami aalajangersarneqarpoq.

Atortunit taamaattunit tunngavissaqanngitsumik kalerrisaarinerit, atortut aserfallatsaaliorneqannginnerisa kingunerisaanik pilersinnaapput.

Ikuallattoornermut kalerrisaarutit nammineq aallartartut tunngavissaqanngitsumik kalerrisaarisarnerat, ikuallattoqanngikkaluartoq tamatumunngaluunniit ulorianartorsiortoqanngikkaluartoq annaassiniarnermut upalungaarsimasut ingerlaannartumik aggersarneqartarnerinik paasineqassaaq.

Kommunalbestyrelsip akitsuummik aalajangersaanerani aningaasartuuterpiaasut sinnerneqassanngillat.

§ 19-imut

Aalajangersagaq nutaajuvoq, tassanilu Naalakkersuisuni ilaasortat tamarmik naalakkersuisoqarfimminni namminneerlutik upalungaarsimanermut pilersaarusiassaminnut pilersaarutinik iliuusissanillu aalajangersaasarnissaat, kiisalu Naalakkersuisut suliassa qarfiit ataasiakkaat upalungaarsimanermut pilersaarutaannik ataqatigiissaarisarnissaat pineqarpoq.

Imm. 1

Upalungaarsimanermik pilersaarusiortermini Naalakkersuisup ulluinnarni suliassanik isumaginnittuusup aamma ajutoortoqarnerani ajunaarnersuaqarneranilu ulluinnarni isumalluutit naammakkunnaartillugit isumaginnittuusariaqarnera tunngavigineqarpoq.

Iliuusissat ajutoortoqarnerani ajunaarnersuaqarneranilu isumaginninnissamut pisariaqartinneqartut pilersaarusiorterannut akisussaaffik naalakkersuisoqarfinni ataasiakkaani inissisimavoq.

Tamatuma nassatarisaanik immikkoortuni akisussaaffiit aalajangersarneqassapput, taakkunanilu Naalakkersuisuni ilaasortat ataasiakkaat ajutoortoqarneranut ajunaarnersuaqarneranullu atatillugu immikkoortortatik akisussaaffigissavaat.

Immikkoortuni akisussaaffiit aalajangersarneqarnerisigut, ulluinnarni aqutsinermini upalungaarsimanermi eqqarsaatigisassanut pisariaqartinneqartunut upalungaarsimanermi piareersakkat sapinngisamik amerlanersaasa inuiaqatigiit aningaasaqarnerannut naleqquttumik ingerlanneqarsinnaanissaat qulakkeerneqassaaq, kiisalu annertuumik ajutoortoqartillugu ajunaarnersuaqartillugulu upalungaarsimanermi ulluinnarni suliat ikaarsaartinneqarsinnaanissaat pilersinneqassalluni. Taamaattumik ulluinnarni isumalluutit naammakkunnaartillugit iliuusissat aallartinneqartussatut pilersaarutigineqartut, ulluinnarni upalungaarsimanermik ineriartortitseqqinnerusassapput. Tamanna pissutigalugu iliuusissani suliassanik nalinginnaasunik aaqqiisarneq suliallu pioreersut aallaaviusassapput.

Naalakkersuisoqarfinni attuumassuteqartuni inatsisit upalungaarsimanissamut aalajangersakkanik iluarsiiisutissanik il.il. pisariaqartinneqartunik imaqaarnissaasa qulakkeernissaa, Naalakkersuisunut ilaasortat ataasiakkaat akisussaaffigaat.

Tamatumani aamma ilanngussaq 1, immikkoortuni akisussaaffiit annertunerusumik nassuiarneqarfigisaat innersuussutigineqarpoq.

Imm. 2

Naalakkersuisut sinnerlugit upalungaarsimanermut naalakkersuisup naalakkersuisoqarfiit ataasiakkaat upalungaarsimanermut pilersaarummut tunngatillugu pilersaarusiaat ataqatigiissaassavai.

Tassalu upalungaarsimanermut naalakkersuisup suliassa qarfiit ataasiakkaat upalungaarsimanermut pilersaarummik, ulluinnarni suliassat saniatigut ajutoortoqartillugu ajunaarnersuaqartillugulu atorneqarsinnaasussamik suliaqarnissaat isumagissavaa. Tamanna Naalakkersuisuni ilaasortat ataasiakkaat suliassa qarfimmi iluani upalungaarsimanermut pilersaarummik suliaqarnissaannik isumaqarpoq.

Kiisalu pisariaqarfiafitigut upalungaarsimanermut naalakkersuisoq oqartussaasunut siunnersuisassaaq.

Kiisalu upalungaarsimanermut naalakkersuisoq pilersaarusionerup oqartussaasunut allanut tunnganngitsortaa sularissavaa. Tassalu upalungaarsimanermut naalakkersuisup pilersaarusionermi oqartussaasunit allanit isumagineqartussaannngitsut isumagissavai, ilaatigut nuna tamakkerlugu upalungaarsimanermut pilersaarut pingaarneq sularissallugu.

Imm. 3

Upalungaarsimanermut ataatsimiititaliaq upalungaarsimanermut pilersaarutit ataasiakkaat ataatsimut aaqqissuunneqarnerinut peqataanermigut suleqataasassaaq, aammalu upalungaarsimanermut pilersaarutit sularineqarnerini pisariaqartitsinikkut siunnersuisassalluni.

Tamatuma saniatigut upalungaarsimanermut ataatsimiititaliaq upalungaarsimanermut pilersaarummik pingaarnermik, ajutoortoqarnerani ajunaarnersuaqarneranilu isumaginninnermut toqqammaviusinnaasumik suliaqassapput. Upalungaarsimanermut pilersaarummik pingaarnermut ilaliussa qarpat, taakku ukiut affakkaarlugit nutarteqartariaqarput, upalungaarsimanerup iluani allannguutaasinnaasut annertuut ilanngunneqarsinnaaniassammata.

Minnerpaamik upalungaarsimanermut pilersaarut pingaarneq ukiut sisamakkaarlugit iluarsaanneqartassaaq, upalungaarsimanermut pilersaarutit nutarterneqartartussaavoq, aammalu pissusiviusunut upalungaarsimanermilu ineriartornermut naleqqunnissaa pisariaqarmat.

§ 20-mut

Aalajangersagaq nutaajuvoq, aammalu kommunalbestyrelsit ataasiakkaat kommunimi upalungaarsimanermut pilersaarummik ataatsimoortumik suliaqartussaanerannut tunngasuulluni.

Imm. 1

Kommunimi upalungaarsimanermut pilersaarummik ataatsimoortumik, ajutoortoqarnerani ajunaarnersuaqarneranilu, imaluunniit pisariaqartitsinermi atorneqartartussamut suliaqartoqarnissaa kommunalbestyrelsip isumagissavaa. Kommunip upalungaarsimanerani suliassat immikkut ittut ulluinnarni sulianit ingerlatitseqqiffiusarnissaat, ulluinnarni suliassani tunngavigineqartussaavoq.

Attaveqatigiinnermi atortoqarfinnik, mittarfinnik, heliportinik, umiarsualivinnik pilersuivinnillu peqarneq kommunip upalungaarsimanermut pilersaarusionerminut atatillugu isumaliutersuutitut ilaatittariaqarpai. Kommunimi sanaartukkanik immikkut ittunik suliffeqarfinnilluunniit ulorianaateqarsinnaasunik peqarpat, taakku kommunip upalungaarsimanermut pilersaarusionerminut atatillugu isumaliutersuutimintut ilaatiinnartussaavai.

Imm. 2

Iluarsiinissaq pisariaqartinneqartoq paasinarsippat, imaluunniit pisariaqartutut isumaqarfigneqarpat, kommunini upalungaarsimanermut pilersaarutit, immaqalu ilaliussat iluarsaanneqassapput.

Assersuutigalugu ajutoortoqartillugu imaluunniit ajunaarnersuaqartillugu upalungaarsimanermut pilersaarutit amigartut, imaluunniit allanngortinneqarlutik pissusiviusunut naleqqussarneqarnissaat pisariaqartinneqartoq paasineqarpat, iluarsaassinissaq pisariaqalersinnaavoq.

Upalungaarsimanermut pilersaarutit kommunimi qinigaaffiusumi ataatsimi minnerpaamik ataasiarluni iluarsaanneqartassaaq, tunngaviusut ilaat piffissami qinigaaffiusumi allannguuteqarsimasinnaammata. Tassani ilaatigut inuit attaveqarfissat pingaarutillit ilaat taarsersorsimasinnaapput, taamaattumillu upalungaarsimanermut pilersaarutit iluarsaanneqarnissaa pisariaqalersimasinnaalluni.

Imm. 3

Upalungaarsimanermut pilersaarutit aamma upalungaarsimanermut pilersaarutitut iluarsiissutit Naalakkersuisut sinnerlugit upalungaarsimanermut Naalakkersuisumut akuerisassanngorlugit nassiunneqassapput. Tassani upalungaarsimanermut pilersaarutit ataatsimut aaqqissuunneqarnissaat tunngaviuvoq, taamaalillutik nunap iluani upalungaarsimanermut pilersaarutitut pingaarnut, Naalakkersuisunit suliarineqartunut naleqqussarneqassammata.

Imm. 4

Imm. 4 kommunini upalungaarsimanermut pilersaarusiata nunap iluani upalungaarsimanermut pilersaarutitut naleqquttunngorlugit maleruagassanik siunnersuutit aalajangersaanissamut Naalakkersuisunut piginnaatitsissutaavoq.

Maleruagassani siunnersuutaasuni ilaatigut kikkut annaassiniarnissamut upalungaarsimasuni akisussaasuunersut aamma qanoq pisoqarnerani annaassiniarnissamut upalungaarsimasut aggersarneqarsinnaanersut allassimasinnaavoq.

Taassuma atuunneratigut Naalakkersuisut sinnerlugit upalungaarsimanermut naalakkersuisuusup, maleruagassiornermi kommunit upalungaarsimanermut pilersaarutaanni killissat aalajangersartassavai.

Taamaalilluni kommunini upalungaarsimanermut pilersaarutit assigiikannersut, kiisalu kommunini upalungaarsimanermut pilersaarutit nunap iluani upalungaarsimanermut pilersaarutitut naleqquttut suliarineqartarnissaat qulakkeerneqassaaq.

§ 21-mut

Aalajangersagaq aaqqissuusaanermigut allannguuteqartinneqarluni peqqussummi maanna atuuttumi § 25-p assingaa. Aalajangersagaq taanna naapertorlugu ilaatigut suliffeqarfinnut toqqorsivinnullu ikuallattoornissamut ulorianaatilinnut, aammalu imerpalasunut ikuallajasunut maleruagassanik teknikkikkullu peqqussutit aalajangersaasoqarsinnaalissaaq.

Kiisalu aalajangersagaq naapertorlugu ilaatigut akunnittarfinni, paaqqinnittarfinni, inini kater-suuttarfinni, taakkunungalu ilanngullugit isiginnaartitsisarfinni, inini saqqummersitsisarfinni,

oqaluffinni aammalu illuni ininilu taakkununga assingusuni, maleruagassanik aalajangersaa-soqarsinnaavoq.

Imm. 1

Imm. 1-imi suliffeqarfinni akuutissanik aalaakkaasunik, imerpalasunik silaannanguuttartunillu, ikuallattoornermut allatulluunniit ajoqusiinermut atatillugu inunnut, illunut avatangiisinullu ulorianartorsiortitsisinnaasunik toqqorsiviusuni, atuiffiusuni sanaffiusuniluunniit pilersitsinissamut, inissiinissamut, ilusilersuinissamut atuinissamullu Naalackersuisut maleruagassiorsinnaanermut inatsisitigut tunngavissinneqarput.

Tamatuma ataani suliffeqarfiup inissisimaffianut, ilusilingaaneranut atorneqarneranullu iliuusissanik, ikuallattoorsinnaanermi imaluunniit qartoorsinnaanermi ulorianartorsiornermik annikillitsiniarluni, kiisalu qatserinermi naleqquttunik periarfissaqarnissaq qulakkeerniarlugu pisariaqartinneqartunik suliniuteqarnissamut Naalackersuisut maleruagassiorsinnaapput.

Suliffeqarfiit ikuallattoornissamut annaassiniarnissamullu atortunik, immaqalu imermik pilersuivimmik nammineq atugassaminnik piseqqullugit peqquneqarnissaannut Naalackersuisut maleruagassiorsinnaapput.

Suliffeqarfinnut taamaattunut akuersissutini il.il. sanaartukkanut teknikkikkut piunasaqaatinik sanaartornermut inatsisit naapertorlugit aalajangersaasoqarsimanngippat, aalajangersaasoqarsinnaavoq.

Kiisalu akuutissanik ikuallajasunik toqqortaqaarnissamut atuinissamullu maleruagassioortoqaarsinnaavoq. Maleruagassani taakkunani ikuallattoornaveersaartitsinissaq ikuallattoorsinnaanermilluunniit annikillisaanissaq, kiisalu ikuallattoqassagaluarpit annaassiniarnissamut qatserinissamullu illersorsinnaasunik peqarnissap qulakkeerneqarnissaa siunertarineqassaaq.

Akuutissanik qaartuujasunik il.il. toqqortaqaarnissamut maleruagassat, kiisalu qummoroortartunik toqqortaqaarnissamut atuinissamullu maleruagassat inatsit alla tunngavigalugu aalajangersarneqarput.

Imm. 2

Imm. 2-mi Naalackersuisut innermik qaammaqqutinillu atuinermut, kiisalu illuni toqqavinnilu ikuallannaveersaartitsissutinik allanik atuinissamut teknikkikkut ingerlatsinikkullu peqqussutinik aalajangersaasinnaanermut periarfissaqarnerat ingerlateqqinneqarpoq.

Taassuma ataani kommunalbestyrelsip ikuallannaveersaartitsinermi iliuuseqarnissamut peqqussuteqaarsinnaanermut piginnaatinneqarnera pillugu maleruagassioortoqaarsinnaavoq.

§ 22-mut

Aalajangersagaq ikuallannaveersaartitsineq qatserinerlu pillugit Inatsisartut peqqussutaata allannngortinneqarnera pillugu Inatsisartut peqqussutaanni nr. 8-mi, 20. november 2006-meersumi § 25 a-mik ingerlatitseqqinneruvoq.

Aalajangersakkap atuutilerneratigut sillimaniarneq eqqarsaatigalugu suliassaqarfinni taagorneqartuni sullissisoq ataasiinnaassasoq Naalackersuisut aalajangersinnaavaat. Aalajangersakkap oqaasertaliornerani aamma suliassaqarfiit taagorneqartut tamarmik immikkut ataasimik

sulisoqarsinnaanerata ajornartinneqanngilaq, taamaalillunilu akuersissummik tunineqartoq ataaseq akuutissanik qaartuujasunik eqqussinissamut kisermaassisinnaatitaassaaq, allalu akuutissanik qaartuujasunik tuniniagaqarnissamut kisermaassisinnaatitaassalluni. Kiisalu sullissisoq ataaseq aamma suliaasaqarfinnut taagorneqartunut tamanut kisermaassisinnaatitaassaaq. Ilaatigut inuit suliffeqarfiilluunniit suliatigut annertuumik ilisimasaqartut kisermaassisinnaatitaanermik nalunaarfigineqartarnerisigut, aalajangersakkami sillimaniarnermut tunngasut tamarmik qaffatsinneqarnissaat anguniarneqarpoq, taamatullu suliaasaqarfik pillugu allaffissornerup eqaannerulernissaa anguniarneqarluni, tassuunakkut sullissisut amerlassutsimikkut appartinneqarsinnaassammata.

Akuersissutinik nalunaaruteqartarnermi suliaasat arlallit pisortatigoortumik suliariumannittussarsiuussinermi neqeroorutigittinneqartarnerissaat eqqarsaatigineqarsinnaavoq, tamatumata kingorna ajugaasoq atortussianik qaartuujasunik ikummajasunillu Kalaallit Nunaannut tamarmiusumik pilersuisinnaanissaq pisinnaatitaaffigilissammagu pisussaaffigilissallugulu.

Akuersissummik nalunaaruteqartarneq aamma suliariumannittussarsiuussisarnerup saniatigut periaatsimik allamik, soorlu toqqaanikkut pisarsinnaavoq.

Imm. 2-mut

Aalajangersakkami Naalakkersuisut imm. 1 naapertorlugu kisermaassisinnaanermik nalunaaruteqarnerminnut atatillugu piumasaqaatinik aalajangersaasinnaanermut piginnaatinneqarput.

§ 23-mut

Aalajangersagaq ikuallannaveersaartitsineq qatserinerlu pillugit Inatsisartut peqqussutaata allanngortinneqarnera pillugu Inatsisartut peqqussutaanni nr. 8-mi, 20. november 2006-meersumi § 25 c-mut assinguvoq.

Akuutissanik qaartuujasunik pisinissamut atuinissamullu akuersissutit suliarineqarnerinut nutarterneqarnerinullu, qaartiterinermi pisortanut akuersissutit suliarineqarnerinut nutarterneqarnerinullu, kiisalu qaartartuusiviit akuerineqarnerinut atatillugu akitsuutinik akiliisitsisoqartassasoq aalajangersakkami allassimavoq.

Akitsuut Inatsisartut aningaasanut inatsisaanni oqaasertaliinikkut aalajangerneqartassaaq. Kisiannili akitsuutip suliaasaqarfimmi allaffissornermi aningaasartuutitut missiliorneqartunit misilittakkanillu tunngaveqartunit amerlanerungaatsiarnissaat siunertarineqanngilaq, tassungalalu misissuisarnermi nakkutilliinermilu iliussissanut, sullissinermut akitsuut aqqutigalugu akilerneqartunut ilaaginnartut ilaatinneqarput.

§ 24-mut

Aalajangersagaq ikuallannaveersaartitsineq qatserinerlu pillugit Inatsisartut peqqussutaata allanngortinneqarnera pillugu Inatsisartut peqqussutaanni nr. 8-mi, 20. november 2006-meersumi § 25 d-mut assinguvoq.

Maleruagassani Naalakkersuisunit aalajangersarneqartuni § 21 naapertorlugu Naalakkersuisunit akuersissutit utertinneqarsinnaanerata pillugu aalajangiisinnaanermut inatsisitigut tunngavissanik aalajangersagaq imaqarpoq. Tassani akuersissutit nalunaarutigineqartup atorunnaarnissaanut tunngavissanik pisoqarsimanissaa eqqarsaatigineqarpoq.

Tassani allaffissornikkut aalajangersakkat, Kalaallit Nunaanni pinerluttulerinermut inatsimmi pineqaatissiissutissanut taaneqartunut ingerlaqatigitillugit atorneqartussat pineqarput. Allaffissornikkut utertitsinerit inuinnarnut taamatullu suliffeqarfinnut, Namminersornerullutik Oqartussanut, kommunit imaluunniit kommunit suleqatigiiffiannut atuutsinneqassapput.

§ 25-mut

Aalajangersagaq aaqqissuussaanermigut allannguuteqartinneqarluni peqqussummi maanna atuuttumi § 18-ip assingaa.

Aalajangersagaq aaqqissuussaanermigut allannguuteqartinneqarluni peqqussummi maanna atuuttumi § 18-ip assingaa.

Aalajangersakkami ilaatigut suliffeqarfiit immikkut ikuallattoornissamut ulorianaatillit pineqarput. Suliffeqarfiit taamaattut pilersinneqarnissaannut akuersissuteqartoqassanersoq naliliinermi, akuutissat ikuallajasut taamaattut piginnaasaannik ilisimasaqarnissaq, aammalu suliffeqarfimmi taamaattumi ikuallattoqalerpat akiuiniarnissamut periarfissanik misilittagaqarsimanissaq pingaaruteqarput.

Taamaattumik upalungaarsimanermut pisortap imaluunniit suliniuteqarnermut pisortap tamanna pillugu oqaloqatigineqarnissaa pingaaruteqarpoq.

Imm. 1

Siunnersuummi § 21 naapertorlugu suliffeqarfiit ilusilersorneqarsinnaanerit maleruagassanik tamanut atuuttunik naammassineqartussanik Naalakkersuisut aalajangersaasinaapput. Maleruagassani taakkunani ilaatigut teknikkimut ingerlatsinermullu peqqusutit, ilaatigullu suliffeqarfiillu ilaannut illup sannaata teknikkimut tunngasortai eqqarsaatigalugit ikuallattoornaveersaartitsinissamut piumasaqaatit pineqarput.

Sanaartornermut inatsisit naapertorlugit akuersissuteqarnissap saniatigut, suliffeqarfiit ikuallattoornissamik ulorianartorsiorfiusut aamma ikuallattoornaveersaartitsinissamut iliuuseqarnissamut maleruagassat naapertorlugit akuersissuteqarnissaat pisariaqartinneqarpoq.

Suliffeqarfinni allani sanaartornermut inatsisit malillugit illup sannaanut ikuallannaveersaartitsinermut atatillugu piumasaqaateqartoqartarpoq, ingerlatsinermullu piumasaqaatit ikuallannaveersaartitsinissamut iliuuseqarnissamut maleruagassat malinneqartarput.

Akuersissuteqarnermut atatillugu suliffeqarfiit ilaatigut ikuallattoornissamut annaassiniarnissamullu atortunik pisinissamut, aammalu suliffeqarfimmi namminermi qatserinissamut atugassamik imermik pilersuiviliinissamut piumasaqarfigineqarsinnaapput.

Kommunalbestyrelsimit akuersissuteqarfiunngitsumik suliffeqarfiit imerpalasunik, silaannanguuttartunik akuutissanillu qaartuujasunik, ikummajasunik imaluunniit immikkut ittumik ikuallajasunik sanaffiusut, suliaqarfiusut atuffiusulluunniit pilersinneqarsinnaanngillat. Taamatullu kommunalbestyrelsimit akuersissuteqarfiunngitsumik suliffeqarfinni allanngortiterinernik, alliliinernik ingerlatsinermiluunniit iliuuseqarnermik annertuunik suliaqartoqarsinnaanngilaq.

Imm. 2

Imm. 2 naapertorlugu illut toqqaviillu ilusilersorneqarnerini atorneqarnerinilu iliuusissanik aalajangersimasunik, ikuallattoornissamut ulorianaatit annikillissutigisinnaasaannik, aammalu annaassiniarnissamut qatserinissamullu periarfissat isumannaatsuunissaannik qulakkeerissutaasinnaasunik kommunalbestyrelsi aalajangiisinnaavoq. Siunnersuummi § 21 naapertorlugu maleruagassiortoqarsimatinnagu aalajangersagaq atorneqassaaq.

§ 26-mut

Aalajangersakkap najoqqutassatigut allannguuteqartinneqarluni ikuallannaveersaartitsineq qatserinerlu pillugit Inatsisartut peqqussutaanni § 19 assingaa.

Imm. 1

Imm. 1 naapertorlugu iliuusissanik, maleruagassani aammalu teknikkimut ingerlatsinermullu tunngatillugu peqqussutini, siunnersuummi § 21, imm. 2, nr. 2 naapertorlugu aalajangersarneqarsimasunik isumagisaqartoqassanersoq, kommunalbestyrelsip aalajangersinnaavaa.

Iliuusissanik, maleruagassani aammalu teknikkimut ingerlatsinermullu tunngatillugu peqqussutini, siunnersuummi § 21, imm. 2, nr. 2 naapertorlugu aalajangersarneqarsimasunik isumagisaqartoqassanersoq kommunit ataasiakkaat namminneerlutik aalajangertassavaat.

Suli maleruagassiortoqarsimanngimmat, aalajangersagaq naapertorlugu maleruagassiortoqarnissaata tungaanut danskit “ingerlatsinermut tunngatillugu peqqussutaat”, pisariaqartinneqartunik naleqqussarneqarsimasut aallaavigineqassapput.

Imm. 2

Imm. 2 naapertorlugu illuni toqqavinnilu, pissutsit immikkut ikuallattoornissamut ulorianaateqarfigisaanni, inuit amerlasuut katersuuffigisartagaanni imaluunniit annertuumik nalillit aserorneqarfigisinnaasaanni ingerlatsinikkut aalajangersimasunik suliniuteqartoqassanersoq, kommunalbestyrelsi aalajangersinnaavoq. Tassani pineqartut ilaatigut tassaapput akunnittarfiit, paaqqinnittarfiit, atuarfiit inillu ilinniartitsiviusut allat, pisiniarfiit inillu tuniniaaffiusut assingusut, init allaffittut atorneqartut, init katersortarfiusut, taakkununga init isiginnaartitsisarfiit, saqqummersitsisarfiit, oqaluffiit illullu assingusut ilaallutik.

Siunnersuummi § 21, imm. 2, nr. 2 naapertorlugu maleruagassiortoqarsimatinnagu aalajangersagaq atorneqartassaaq.

Ikuallattoornissamut annaassiniarnissamullu atortussanik pissarsisoqassasoq, aammalu nammineerluni qatserinissamut imermik pilersuivimmik periarfissiisoqassasoq kommunalbestyrelsip ilaatigut peqqussutigisinnaavaa. Kiisalu ikuallattoornermi kalerrisaarutinik aammalu qatserutinik nammineerlutik aallartartunik ikkussinissaq kommunalbestyrelsip piumasarisinnaavaa.

Imm. 3

Init katersortarfiit atorneqarnerini imaluunniit aaqquissuussinernik ingerlatsinermi, tassungalu ilanngullugit saqqummersitsinermi, festivalinik ingerlatsinermi isiginnaartitsinermilu ikuallattoorsinnaanermut pigaartoqartitsisoqassanersoq kommunalbestyrelsip aalajangersinnaavaa.

Qaqugu ikuallattoorsinnaanermut pigaartoqartitsisoqassanersoq naleqqunnersoq pisariaqartin-neqarnersorlu kommunalbestyrelsip aalajangersinnaavaa. Assersuutigalugu inuit amerlasuut katersuuffigisaannik pisortatigoortumik pisoqarnerani ikuallattoornissamut pigaartoqartitsinissaq naleqqussinnaavoq.

Kisiannili aamma pisortatigoortumik aqqissuussinerni tamani ikuallattoornissamut pigaartoqartitsisoqartarnissaa kommunalbestyrelsip aalajangersinnaavaa.

Kommunalbestyrelsi aalajangiisinnaatitaavoq, kommunalbestyrelsi kommunimi annaassiniarnissamut upalungaarsimasunut qullersaasutut akisussaasuummat.

Kiisalu aqqissuussinerni aqqissuussisoq kommunip ikuallattoornissamut pigaartuutitaqarnerminut atatillugu aningaasartuutaanut akiliisineqassanersoq kommunalbestyrelsip aalajangersinnaavaa.

Kommunip suliassat matuma siuliani taaneqartut kommunimi maleruagassat malillugit isumagissavai.

§ 27-mut

Aalajangersagaq aqqissuussaaneermigut allannguuteqartinneqarluni peqqussummi maanna atuuttumi § 4, imm. 9-p assingaa.

Imm. 1

Imm. 1-imi kommunalbestyrelsip suliffeqarfinni, illuni eqqissisimatitani, illuni inuit amerlasuut katersuuffigisartagaanni aammalu illuni toqqorsivinnilu ikuallattoornissamut ulorianaateqartuni ikuallattoorsinnaanermik misissuisarnissaa aalajangersarneqarpoq. Tunngaviusumik pingaarnertullu annaassiniarnissamut upalungaarsimasut pisortaat imaluunniit inuk piginnaanilik alla, kommunalbestyrelsimit toqqarneqarsimasoq ikuallattoorsinnaanermik misissuisartussaavoq.

Maannamut atuuttutut inuk ikuallattoornissamik ilisimasalik kommunimit atorfinitsinneqarsimasoq ikuallattoorsinnaanermik misissuisartussaavoq, inuk ikuallattornissamik ilisimasalik pisariaqartinneqartunik immikkut ilisimasaqartarmat.

Imm. 2

Aalajangersakkami ikuallattorsinnaanermik misissuisarnissamut aalajangersakkanik tamanut atuuttunik aalajangersaanissamut Naalakkersuisut periarfissinneqarput.

Nalunaarut suliffeqarfinni, illuni eqqissisimatitani illunilu inuit amerlasuut katersuuffigisartagaanni, soorlu katersortarfinni imaluunniit kommunimi inini allani akuttoqatigiinnik ikuallattoorsinnaanermik misissuisarnissamut maleruagassanik imaqarsinnaavoq.

Kiisalu ikuallattoorsinnaanermik misissuinermi amigaataasinnaasut paasineqartut iluarsineqarnissaannut peqqussuteqarsinnaanermut maleruagassiornissamut Naalakkersuisut piginnaatinneqarput. Tamanna assersuutigalugu suliffeqarfinnut illunulluunniit inuit amerlasuut katersuuffigisartagaannut tunngasinnaavoq.

Imm. 3

Upalungaarsimanermi pisortaq, suliniuteqarnermut pisortaq inulluunniit ikuallattoqarneranik ilisimasalik kommunimit atorfinitsinneqarsimasoq alla eqqartuussivimmit aalajangiinertaqanngitsumik ikuallattoorsinnaanermik misissuisinnaavoq. Inuulli ikuallattoorsinnaanermik misissuisup ilisarnaammik naleqquttumik peqarnissaa pingaaruteqarpoq. Eqqartuussivimmit aalajangiissummik piniaqqaarani ikuallattoorsinnaanermik misissuisinnaanissaq tamatumunnga tunuliaqutaavoq, tamanna pissappat utaqqisoqartariaqartartussaammatt, ikuallattoorsinnaanermillu misissuinissaq pisariaqartoq kingusinaartinneqarsinnaalluni.

Ikuallattoorsinnaanermik misissuisoq sanaartukkani sullissinermi ikuallattoornissamat teknikkimut tunngasumik ilinniagaqarsimasariaqarpoq, aammalu ikuallattoorsinnaanermik misissuisarnermik pikkorissarsimasariaqarluni, taamaalilluni inuk pineqartoq ikuallattoorsinnaanermik misissuinerup kingunerisassaanik immikkut ilisimasaqartussaammatt paasisimaarinnittussaallunilu. Tamanna toqqaannartumik piumasaqaataangilaq, taamaallaalli ikuallattoorsinnaanermik misissuisup suliaasaqarfimmut pisariaqartinneqartunik ilisimasaqarnissaanut innersuussutaalluni.

Ikuallattoorsinnaanermik misissuineq illu ikuallattoorsinnaanermut isumannaatsuutitsinissamat piumasaqaatinik naammassinniffiuersoq, taamaalillunilu ikuallattoornissap pinaveersaartinneqarnissaa qulakkeerniarlugu siumoortumik misissuineruvoq.

Naleqquttumik kinaassutsimut ilisarnaateqarnermi ikuallattoorsinnaanermik misissuisup ikuallattoorsinnaanermik misissuisinnaanini, aammalu annaassiniarnissamat upalungaarsimanermi pisortaanini allatulluunniit kommunimit atorfeqartinneqarnini uppernarsarsinnaavaa.

Taamaattumik kommunimi atorfeqartut tamarmik ikuallattoorsinnaanermik misissuinissamat pisinnaatitaangillat imaluunniit eqqartuussivimmit aalajangiinertaqanngitsumik ikuallattoorsinnaanermik misissuisinnaatitaanatik. Tamanna tunngavigalugu kinaassutsimut uppernarsaat kommunalbestyrelsimit suliarineqartariaqarpoq.

§ 28-mut

Aalajangersagaq nutaajuvoq, tassanilu kommunalbestyrelsip ikuallattoorsinnaanermik misissuinerisa inernerinik pineqaatissiissutaasunillu tamanut ammasumik saqqummiussisarnerinut maleruagassiornissamat Naalakkersuisut inatsisitigut tunngavissinneqarput.

Suliffeqarfinni, illuni eqqissisimatitani illunilu inuit amerlasuut katersuuffigisartagaanni, soorlu katersortarfinni imaluunniit kommunimi inini allani ikuallattoorsinnaanermut misissuinerup inernerinik tamanut ammasumik saqqummiisinnaaneq nalunaarummi allassimasinnaavoq.

Tamanut ammasumik saqqummiussinermi inuinnaat suliffeqarfiillu misissuiffigineqarsimasut aqqi, kiisalu inuinnaat suliffeqarfiillu, ikuallattoorsinnaanermik misissuinerup kingunerisaaq peqqussuteqarfigineqartut aqqi ilaatinneqarsinnaapput.

Kiisalu nalunaarummi ikuallattoorsinnaanermik misissuinermut atatillugu pineqaatissiissutaasinnaasunik aalajangersakkanik aalajangersaasoqarsinnaavoq.

Assersuutigalugu ikuallattoorsinnaanermik misissuinermi ikuallattoornissamut isumannaallisaanermi ajoquteqartoqartoq amigaateqartoqartorluunniit paasineqarpat, pineqaatissiissutissat atuuttussanngortinneqarsinnaapput.

Tamanut ammasumik saqqummiinermi ilaatigut atortut elektroniskiusut atorneqarsinnaapput.

§ 29-mut

Aalajangersakkap najoqqutassatigut ataasiakkaanik allannguuteqarluni peqqussummi maanna atuuttumi § 4, imm. 7 aamma 8, § 21 aamma § 24 assigai.

Stk.1

Aalajangersakkami Naalackersuisut paaviaasarnermut salisarnermullu aalajangersakkanik aalajangersaanissamut inatsisitigut tunngavissinneqarput. Paaviaasarnikkut ikuallattoornissamik pinaveersaartitsinermi iliuuseqartarneq tamatumunnga tunngaviuvoq, taamaattumillu Naalackersuisut tamanna pillugu maleruagassanik aalajangersaasinnaapput.

Nalunaarummi ikuallattoornissamik pinaveersaartitsissutitut akuttoqatigiinnik paaviaasarnissaq pillugu maleruagassiortoqarsinnaavoq.

Kiisalu nalunaarut pujoorfinnik illunillu ikumatitsivilinnik misissuisarnissamut maleruagassanik imaqarsinnaavoq, ilaatigut pujoorfiit, ikumatitsiviit, tassungalu ilanngullugu iffioorfiit, pujooriviit, isumannaatsuunersut aammalu naleqquttumik aserfallatsaalineqarnerisut salinneqartarnersullu misissorneqartartussaallutik.

Imm.2

Aalajangersagaq malillugu kommunalbestyrelsi pisussaavoq, ikuallattoornissamut pinaveersaartitsinermit atatillugu inatsisit malillugit paaviaasoqartarnissaa isumagissallugu.

Tamanna tunngavigalugu kommunalbestyrelsi inatsisit malillugit paaviaasarnermik isumaginnittuusussamik toqqaassaaq.

Imm. 3

Inatsisini pisussaaffiliussat malillugit paaviaasarnerit inunnit paaviaasutut pikkorissartitsinernek akuerisanik, kommunalbestyrelsinit akuerineqarsimasunik naammassinnissimasunit suliarineqartassasut aalajangersakkami allassimavoq.

Aamma piunasaqaat naammassiniarlugu paaviaasunut pikkorissartitsinernek akuerisanik neqerooruteqarnissaq pisariaqalersinnaavoq.

Imm. 4

Paaviaasut kinaassutsimut ilisarnaammik naleqquttumik takutitsinnaasut illunut imaluunniit pigisanut sunulluunniit isersinnaasut aalajangersakkami allassimavoq.

Paaviaasut tamatigut inuit najugaannut suliassatik isumaginiarlugit isersinnaaneri ajornanngittuaannanngitsoq paasinarsisimammat, tamatumunnga tunngavigineqarpoq. Taamaattumik paaviaasut sulinerminnut atatillugu inissiamut isersinnaanissaat aalajangersakkanut ilanngunneqarpoq.

§ 30-mut

Aalajangersagaq peqqussummi maanna atuuttumi § 24-p assingaa.

Imm. 1

Illunik ininilluunniit ikumatitsivinnik pisatalersukkanik piginnittut atuisulluunniit ikumatitsivinnik taakkunangaanniillu putsup aqqutaanik saligaatsuutitsinissamik pisussaaffeqartut imm. 1-imi taaneqarpoq. Tassalu piginnittut atuisulluunniit pinaveersaartitsinissaq pingaarneq siunertaralugu saligaatsuutitsissapput.

Imm. 2

Imm. 2 naapertorlugu pujoorfinnik, ikumatitsivinnik, putsup aqqutaani putsullu anilaarfiinik aserfallatsaaliuineq piginnittup akisussaaffigaa. Taamaalilluni atuisup amigaateqartoqartoq malugiguniuk pisussaavoq, amigaateqartoqarnera pillugu piginnittumut imaluunniit annaassiniarnissamut upalungaarsimasut pisortaannut, taassumaluunniit peqannginnerani taartaanut nalunaaruteqassalluni.

Tassalu atuisoq pisussaavoq pinaveersaartitsinermeri pingaarnernik iliuuseqassalluni, taamaaliornikkut pisoqarsinnaaneranut pisariaqartunik iliuuseqassagami.

§ 31-mut

Aalajangersagaq aaqqissuussaannermigut allannguuteqartinneqarluni peqqussummi maanna atuuttumi § 12-ip assingaa.

Ikuallattumik imaluunniit ikuallattoqarsinnaaneramik ulorianartorsiortumik malugisaqartup ulorianartorsiortut ilisimatissagai, kiisalu annaassiniarnissamut upalungaarsimasut kalerrissagai aalajangersakkami allassimavoq.

Ikuallattoqartillugu tamatumunngaluunniit ulorianartorsiortoqartillugu tamatigut annaassiniarnissamut upalungaarsimasut kalerrinneqartassapput, taamaaliornikkut annaassiniarnissamut upalungaarsimasut pisumi suliniuteqarsinnassammata isumaginnissinnaassallutillu.

Kiisalu ikuallattumik imaluunniit ikuallattoqarsinnaaneramik ulorianartorsiortumik malugisaqartup inneq sakkukillisinniassavaa, imaluunniit innermik ikummareersumik tamatumunngaluunniit ulorianartorsiortormik annikillisitsiniarluni iliuuseqarnermigut ulorianartorsiorneq pinngitsoortinniassallugu.

Ikuallattoqarneramik imaluunniit ikuallattoqarsinnaaneramik ulorianartorsiortumik malugisaqartoq pisussaangilaq, nammineq inuunerminut ulorianartortitsisumik ikuallannermik annikillisitsiniassalluni ulorianartorsiortormillu pinngitsoortitsiniassalluni. Pisussaaffik taamaallaat inuup nammineerluni inuuneranut naammaginartumik isumannaassuseqartillugu atuutissaaq.

§ 32-mut

Aalajangersagaq aaqqissuussaannermigut allannguuteqartinneqarluni peqqussummi maanna atuuttumi § 13-ip assingaa.

Imm. 1

Kikkulluunniit ikuallattoqarneranut atatillugu sapinngisaminik pisariaqartinneqartumik ikiuunnissamut pisussaaffeqartut imm. 1-imi aalajangersarneqarpoq. Tamatuma nassatarisaanik innuttaasut kikkulluunniit ikuallattoqarnerani annaassiniarnissamut upalungaarsimasut sulinerannut ikiuunnissamut pisussaaffeqarput.

Imm. 2

Ikuallattoqarnerani najuuttoq annaassiniarnermut qatserinermullu suleqataanissaa imm. 2-mi aalajangersarneqarpoq. Annaassiniarnissamut upalungaarsimasut annaassiniarnerminnut qatserinerminnullu atatillugu ikioqquppata, pisussaaffik immikkut ittumik atuuttussaavoq.

Imm. 3

Annaassiniarnermut qatserinermullu ikiuussimasup sulinermini annaasaminut taarsiiffigineqarnissamut pisinnaatitaaffeqarnera imm. 3-mi oqaatigineqarpoq. Sulinermi annaasanut taarsiisoqassapat, annaassiniarnermut qatserinermullu suleqataanermi annaasaqartoqarsimanissaa piumasarineqarpoq.

Sulinermi annaasanut taartissat kommunimit, kommunimi annaassiniarnissamut upalungaarsimasunut qullersatut oqartussaasuusumit akilerneqassapput.

§ 33-mut

Aalajangersakkap najoqqutassatigut ataasiakkaanik allannguuteqarluni peqqussummi maanna atuuttumi § 16-ip assingaa.

Imm. 1

Kikkulluunniit peqqussutit, annaassiniarnissamut upalungaarsimasunit saqqummiunneqartut naalattussaagaat immikkoortumi aalajangersarneqarpoq, tassalu annaassiniarnissamut upalungaarsimasut inummut peqqussuteqassappata taamatulluunniit pippata, peqqussut naalanneqartussaavoq.

Peqqussut ilaatigut sumiiffimmi aalajangersimasumi annaassiniarnissamut upalungaarsimasut suliniuteqarnerminnut atatillugu suliaminnik ingerlatsiviani angalaqqusaannginnermut tunngasinnaavoq.

Imm. 2

Politiit annaassiniarnissamullu upalungaarsimasut suliaminnik ingerlatsisinnaanissaat anguniarlugu, imm. 2-mi kikkulluunniit suliniuteqarnermut atatillugu politiit assiaqusersuutaat naalassallugit, kiisalu sumiiffiit assiaqusersukkat taakkunungaluunniit aqqusernit qimaqqullugit politiit annaassiniarnissamullu upalungaarsimasut kaammattuutaat naalassallugit pisussaaffeqarput. Politiit annaassiniarnissamullu upalungaarsimasut avataaneersunit ajoqusersorneqaratik akornusersorneqaratilluunniit suliassaminnik sulisinnaanissaat tamatumunnga pissutaavoq.

Imm. 3

Imm. 3-mi qimarnussisarnermut, katersuuffinnut inissiiviugallartunullu maleruagassat aalajangersarneqarput.

Kikkulluunniit qimarnussisoqarnissaanik naalakkiisoqarnerani piffissaliussap iluani sumiiffik najugartik qimattussaagaat, aammalu katersuuffissatut inissiiffissatulluunniit toqqarneqartumut aqqusernit innersuunneqartut aqputigalugit ingerlassasut imm. 3-mi immikkut maleruagassiuunneqarput.

Tassalu ajutoortoqartillugu ajunaarnersuaqartilluguluunniit annaassiniarnissamut upalungaarsimasut aggersarneqarsimatillugit katersuuffissanik inissiigallarfissanillu, qimarnussinissaq pisariaqartinneqarpat atorneqartussanik nalunaarsuisoqassaaq.

§ 34-mut

Aalajangersagaq nutaajuvoq.

Imm. 1

Innuttaasup kialuunniit qinnuigineqarnermini inissiamik najukkaminik ininilluunniit allanik inunnut navialisunut atugassiinissamut, aammalu pisinnaasani naapertorlugu nerisaqartitsinissamut pisussaaffeqarneranut tunngasuuvoq.

Tassalu inuinnaap inissiamik atugassiinissaa annaassiniarnissamut upalungaarsimasut qinnutigippassuk, innuttaasooq inissiamik atugassiisussaavoq. Annaassiniarnissamut upalungaarsimasut tamanna pisariaqartinneqartutut isummerfigippassuk, tamanna inuinnarnut suliffeqarfinnullu atuutissaaq.

Imm. 2

Tamatumunnga ajunngitsorsiassatut akiliutissap annertussusissaa Naalakkersuisut nalunaarusiornermikkuut aalajangissavaat. Ajunngitsorsiassat inissiamik ininilluunniit allanik inunnut navialisunut atugassiinermi aningaasartuutiviusunut naapertuutissapput.

Tamatuma saniatigut nerisaqartitsisoqarsimappat, tamatumunnga ajunngitsorsiassanut maleruagassanik aalajangersaasoqarsinnaavoq.

Ajunngitsorsiassat taamaallaat ineqartitsinermut nerisaqartitsinermullu atatillugu aningaasartuutitut taarsiissutitut isigineqassapput. Taamaattumik ajunngitsorsiassat iluanaarutaassanngillat, taamaallaalli aningaasartuutiviusimasunut matussutissaassallutik.

§ 35-mut

Aalajangersagaq pineqaatissiisarnermut aalajangersagaavoq.

Imm. 1

Imm. 1-ip atuunneratigut § 31-mik, § 32, imm. 1-imik aamma § 33 imm. 2-mik unioqqutitsisoq akiliisussanngortinneqarsinnaavoq, tassalu annaassiniarnissamut upalungaarsimasut sulinerannut atatillugu ikiuuutinngitsoq akiliisussanngortinneqarsinnaavoq.

Innuttaasut ikiuunnissamut assigiimmik pisussaaffeqarnerat, kiisalu annaassiniarnissamut upalungaarsimasut ikioqqullutik qinnuteqarsinnaanissaat tamatumunnga tunuliaqutarineqarpoq. Pisussaaffigisamik ikiuutinngitsoq akiliisussanngortinneqarsinnaavoq.

Imm. 2

Aalajangersakkami § 14, imm. 1, § 25, imm. 2, § 26, § 32, imm. 2, § 33, § 34, imm. 1 naapertorlugit peqqussummik inerteqqummilluunniit naammassinninngitsup akiliisussanngortinneqarsinnaanera periarfissinneqarpoq.

Ajutoortoqarnerani ajunaarnersuaqarneranilu annaassiniarnissamut upalungaarsimasut politiillu suliniuteqarnerannut atatillugu peqqussutinik inerteqqutinillu naalanngitsoq akiliisussanngortinneqarsinnaavoq.

Imm. 3

Kommunalbestyrelsimit akuerineqanngitsumik suliffeqarfimmi annertuumik allanngortiterisoqarpat, alliliisoqarpat imaluunniit suliffeqarfiup ingerlanneqarneranik allannguisoqarpat § 25, imm. 1 naapertorlugu akiliisussanngortitsisoqarsinnaasoq, aalajangersakkami aalajangersarneqarpoq.

Tassalu kommunalbestyrelsimit akuerineqaqqaarani suliffeqarfimmi, siunnersuummi § 21-mut ilaatinneqartumi annertuumik allanngortiterisoqarpat, alliliisoqarpat ingerlatsinermilluunniit allannguisoqarpat suliffeqarfik pineqartoq akiliisussanngortinneqarsinnaavoq. Suliffeqarfiit § 21, imm. 1 naapertorlugu ulorianaatilinnik avatangiiseqarsinnaanerata tamatumunnga pissutaavoq.

Imm. 4

Naalackersuisut Inatsisartut inatsisaat manna naapertorlugu peqqussusiornermikkut peqqussutini aalajangersakkanik unioqquitsinermi, imaluunniit tassani peqqussutinik inerteqqutinilluunniit naammassinninnginnermi akiliisussanngortitsisarneq aqputigalugu pineqaatissiisutaasinnaasunik aalajangersaasinnaanerata, aalajangersakkami allassimavoq.

Naalackersuisut peqqussutinik aalajangersaasinnaanissaat, taakkulu malillugit peqqussutit unioqquatinneqarnerini akiliisussanngortitsilluni pineqaatissiisoqarsinnaanissaa anguniarlugu imm. 4 ilanngunneqarpoq.

Imm. 5

Unioqquitsineq suliffeqarfimmit, tamakkiisumik ilaannaasumilluunniit Naalagaaffimmit pigineqartumit, Kalaallit Nunaanni Namminersorlutik Oqartussanit, kommunimit ataatsimit imaluunniit kommunit suleqatigiiffiannit, aktiaatileqatigiiffimmit, anpartsselskabimit, andelsselskabimit assigisaanilluunniit piliarineqarsimappat, suliffeqarfiup il.il. taamatut akisussaatinneqarnissaa aalajangersakkami aalajangersarneqarpoq.

Unioqquitsineq Kalaallit Nunaanni Namminersorlutik Oqartussanit, kommunimit ataatsimit imaluunniit kommunit suleqatigiiffiannit piliarineqarpat tamannattaq atuutissaaq.

Aalajangersakkap atuutilerneratigut taamaalilluni suliffeqarfiit akiliisussanngortitsinermi akisussaatinneqalersinnaalerput.

§ 36-mut

Aalajangersakkap najoqqutassatigut allannguuteqarluni § 26, imm. 1 assingaa. Aalajangersagaq pineqaatissiisarnermut aalajangersagaavoq.

Inuk, naleqquttumik mianersuussinissamut innermik, naneruutinik, ikitsisinik, arsakunik, akoorutissanik ikuallattoornissamut navianaatilinnik, aammalu ikuallattoorutaasinnaasunik ikummarsinnaasunilluunniit atuinngitsoq, imaluunniit inuk, inoqutigiinnut suliffeqarfimmilluunniit ilaasoq taamatut mianersuussinissamik nakkutiginnitsoq akiliisussanngortinneqarsinnaavoq.

Aammattaq sanaartukkanik innaallagiamoortunik imaluunniit qaammaqquteqarfinnik, kiassaateqarfinnik, nukissiuuteqarfinnik maskiinaqarfinnilluunniit ikuallattoorutaasinnaasunik ikummartitsinnaasunilluunniit piginnittoq atuisorluunniit, atortut taamaattut isumannaatsumik pitsaassuseqanngikkaluartut atorunigit atortikkunigilluunniit akiliisussanngortinneqarsinnaavoq.

§ 37-mut

Imm. 1

Aalajangersagaq atuutsitsilernissamut aalajangersagaavoq. Inatsisip 1. juli 2010-mi atuutilernissaa siunnersuutigineqarpoq.

Tamatumunnga peqatigitillugu ikuallannaveersaartitsineq qatserinerlu pillugit Inatsisartut peqqussutaat nr. 6, 30. oktober 1992-imeersoq atorunnaarsinneqarpoq.

Imm. 2

Aalajangersakkami allassimavoq, nalunaarutit kaajallaasitallu ikuallannaveersaartitsineq qatserinerlu pillugit Inatsisartut peqqussutaat nr. 6, 30. oktober 1992-imeersoq naapertorlugu suliarineqarsimasut Inatsisartut inatsisaanni matumani aalajangersakkat naapertorlugit allanngortinneqarnissamik atorunnaarsinneqarnissamilluunniit tungaanut atuutiinnassasut.

Imm. 3

Imm. 3-mi aalajangersarneqarpoq, Nalunaarutit il.il. ikuallattoornissamut inatsit nr. 513, 21. december 1979-imeersoq tunngavigalugu suliarineqarsimasut atorunnaarsinneqarnissamil-luunniit tungaanut atuutiinnassasut.